

摘藻堂四庫全書薈要

史部

欽定四庫全書薈要

史部
元史卷三十七
至四十七

詳校官主事銜臣徐以坤



欽定四庫全書薈要卷六千四百十六 史部

元史卷三十七

明翰林學士亞中大夫知制誥兼修國史宋濂等修

本紀第三十七

寧宗

寧宗冲聖嗣孝皇帝諱伊埒哲伯明宗第二子也母曰
皇后孛瑪錦氏初武宗有子二人長明宗次文宗延祐
中明宗封周王出居朔漠泰定之際正統遂偏天厯元



年文宗入紹大統內難既平即遣使奉皇帝璽綬北迎
明宗明宗崩文宗復即皇帝位明宗有子二人長托歡
特穆爾次即帝也天曆二年二月乙巳封帝為郕王至
順三年八月己酉文宗崩于上都皇后導揚末命申固
讓初志傳位於明宗之子時托歡特穆爾出居靜江帝
以文宗眷愛之篤留京師太師太平王右丞相雅克特
穆爾請立帝以繼大統乃遣使徵諸王會京師朝廷政
務咸啓中宮取進止甲寅中書省臣奉中宮旨預備大

朝會賞賜金銀幣帛等物乙卯雅克特穆爾奉中宮旨
賜駙馬額布根子呼塔噶齊太尉布呼齊向容郡王達
朗達賚僉事蘇爾蘇克穆爾台之子圖卜特穆爾公主
布達拉安遠王綽哈妃公主托歡巴圖永寧王瑪展妃
公主諤勒哲台及公主徹爾特穆爾等金銀幣鈔有差
是月渾源雲內二州隕霜殺禾冀寧路之陽曲河曲二
縣及荆門州皆旱江水又溢高郵府之寶應興化二縣
德安府之雲夢應城二縣大雨水九月丁丑填星犯太

徵垣左執法辛巳修皇太后儀仗是夜地震有聲來自
北是月益都路之莒沂二州泰安州之奉符縣濟寧路
之魚臺豐縣曹州之楚邱縣平江常州鎮江三路松江
府江陰州中興路之江陵縣皆大水河南府之洛陽縣
旱十月庚子帝即位于大明殿大赦天下詔曰洪惟太
祖皇帝啓闢疆宇世祖皇帝統一萬方列聖相承法度
明著庫魯克皇帝入纂大統修舉庶政動合成法授大
寶位于布延圖皇帝以及格根皇帝厯數之歸當在胡

土克圖皇帝濟雅圖皇帝而各播越遼遠時則惟雅克
特穆爾建義效忠戡平內難以定邦國協恭推戴濟雅
圖皇帝登極之始即以讓兄之詔明告天下隨奉璽綬
遠近胡土克圖皇帝朔方言還奄棄臣庶濟雅圖皇帝
薦正宸極仁義之至視民如傷恩澤旁被無間遠邇顧
育眇躬尤篤慈愛賓天之日皇后傳顧命於太師太平
王右丞相達爾罕雅克特穆爾太保浚寧王知樞密院
事巴延等謂聖體彌留益推固讓之初志以宗社之重

屬諸大兄胡土克圖皇帝之世嫡乃召諸王宗親以十月一日來會于大都與宗王大臣同奉遺詔揆諸成憲宜御神器以至順三年十月初四日即皇帝位于大明殿可大赦天下自至順三年十月初四日昧爽以前除謀反大逆謀殺祖父母父母妻妾殺夫奴婢殺主謀故殺人但犯強盜印造偽鈔蠱毒魘魅犯上者不赦外其餘一切罪犯咸赦除之大都上都興和三路差稅免三年腹裏差發并其餘諸郡不納差發去處稅糧十分為

率免二分江淮以南夏稅亦免二分土木工役除倉庫
必合修理外毋復剗造以紓民力民間在前應有逋欠
差稅課程盡行蠲免監察御史肅政廉訪司官并內外
三品以上正官歲舉才堪守令者一人申達省部先行
錄用如果稱職舉官優加旌擢一任之內或犯贓私者
量其輕重黜罰其不該原免重囚淹禁三年以上疑不
能決者申達省部詳讞釋放學校農桑孝義貞節科舉
取士國學貢試並依舊制廣海雲南梗化之民詔書到

日限六十日內出官與免本罪許以自新於戲肆予沖人託于天下臣民之上任大守重若涉淵冰尚賴宗王大臣百司庶府交修乃職思盡厥忠嘉與億兆之民共保承平之治咨爾多方體予至意故茲詔示想宜知悉詔以知樞密院事薩都為御史大夫中書右丞薩題為中書平章政事宣政使奇爾濟蘇為中書左丞中書平章政事圖勒噶特穆爾知樞密院事乙巳造皇太后玉冊玉寶丁未皇太后命作兩宮幄殿車乘供張戊申賞

賚諸王金幣其數如文宗即位之制立徽政中政二院
己酉太白犯斗宿敕諸王駙馬勳舊大臣及中書省樞
密院御史臺秩正二品百司庶府秩至一品者闕門內
得施繩牀以坐餘皆禁之庚戌修郊祀法服以宦者特
古斯哈喇烏達里克哈噶濟庫庫楚並為中政院使辛
亥以江浙歲比不登其海運糧不及數俟來歲補運壬
子定婦人犯私鹽罪著為令甲寅諸王保賽音遣使貢
塔哩雅八十八斤佩刀八十賜鈔三千三百錠乙卯以

即位告祭南郊丙辰給宿衛士蒙古漢軍三萬人禦寒
衣命江浙行省範銅造和寧宣聖廟祭器凡百三十有
五事己未告祭太廟庚申告祭社稷以己延為徽政院
使依前開府儀同三司浚寧王太保錄軍國重事知樞
密院事提調忠翊侍衛親軍都指揮使司事巴咱爾右
都威衛都指揮使常布呼齊並為徽政院使賜諸妃后
大朝會賞賚有差甲子賜諸王呼喇台鈔五百錠皇弟
雅克特古斯受戒於西僧嘉勒幹巴勒百官及宿衛士

有濟遜衣者凡與宴饗皆服以侍其質諸人者罪之丙

寅楚邱縣河堤壞發民丁二千三百五十人修之十一

月己巳詔翰林國史集賢院奎章閣學士院集議先皇

帝廟號神主升祔武宗皇后及改元事庚午賜郟王齊

齊克圖以海寧州朐山贛榆沭陽三縣壬申命郟王齊

齊克圖鎮遼陽甲戌遣宿衛官阿恰齊以上皇太后玉

冊告祭南郊中書平章巴咱爾告祭太廟戊寅奉玉冊

玉寶尊皇后曰皇太后皇太后御興聖殿受朝賀己卯

帝御大明殿受朝賀庚寅寅賜諸王庫春幣帛各二千匹
以周其貧左欽察衛士饑賑糧二月壬申帝崩年七歲
甲午葬起輦谷從諸陵明年六月己巳明宗長子托歡
特穆爾即位至元四年三月辛酉諡曰冲聖嗣孝廟號
寧宗四月乙酉祔于太廟

元史卷三十七

元史卷三十七考證

請立帝以繼大統 按順帝紀及雅克特穆爾傳雅克特穆爾欲立文宗子雅克特古斯后不從而止此云請立帝以繼大統殊為失實

甲寅 原刻上有八月二字係復出今刪

想宜知悉 原刻脫宜字不復成句今據永樂大典增至元四年三月辛酉謚曰冲聖嗣孝廟號寧宗 按順帝紀上謚祔廟在三年正月與此異

欽定四庫全書薈要卷六千四百十七史部

元史卷三十八

明翰林學士亞中大夫知制誥兼修國史宋濂等修

本紀第三十八

順帝一

順帝名托歡特穆爾明宗之長子母哈爾努特氏名瑪里達郡王阿爾斯蘭裔孫也初太祖取西北諸國阿爾斯蘭率其衆來降乃封為郡王俾領其部族及明宗北

狩過其地納哈爾努特氏延祐七年四月丙寅生帝于北方泰定帝崩太師雅克特穆爾與諸王大臣迎立文宗文宗既即位以明宗嫡長復遣使迎立之明宗即位于和寧之北而立文宗為皇太子及明宗崩文宗復正大位至順元年四月辛丑明宗后班布爾實被讒遇害遂徙帝高麗居大青島中不與人接閱一載復詔天下言明宗在朔漠之時素謂非其己子移于廣西之靜江三年八月己酉文宗崩雅克特穆爾請文宗后立太子

雅克特古斯后不從命立明宗次子伊埒哲伯是為寧宗十一月壬辰寧宗崩雅克特穆爾復請立雅克特古斯文宗后曰吾子尚幼托歡特穆爾在廣西今年十三矣且明宗長子禮當立之乃命中書右丞竒爾濟蘇迎帝于靜江至良鄉迓以鹵簿雅克特穆爾既見帝並馬徐行具陳迎立意帝幼且畏之一無所答雅克特穆爾疑之故帝至京久不得立適太史亦言帝不可立立則天下亂以故議未決遷延數月國事皆決於雅克特穆

爾奏文宗后而行之會雅克特穆爾死后乃與大臣定
議立帝且曰萬歲後其傳位於雅克特古斯若武宗仁
宗故事諸王宗戚奉璽綬勸進四年六月己巳帝即位
于上都詔曰洪惟我太祖皇帝受命于天肇造區夏世
祖皇帝奄有四海治功大備列聖相傳丕承前列我皇
祖武宗皇帝入纂大統及致和之季皇考明宗皇帝遠
居沙漠濟雅圖皇帝戡定內難讓以天下我皇考賓天
濟雅圖皇帝復正宸極治化方隆奄棄臣庶今皇太后

召大臣雅克特穆爾巴延等曰昔者科綽托克托穆爾
濟爾噶朗等謀逆以明宗太子為名又先為班布爾實
始以妬忌妄構誣言疎離骨肉逆臣等既正其罪太子
遂遷于外濟雅圖皇帝後知其妄尋至大漸顧命有曰
朕之大位其以朕兄子繼之時以朕遠征南服以朕弟
伊埒哲伯登大位以安百姓乃遽至大故皇太后體承
濟雅圖皇帝遺意以武宗皇帝之元孫明宗皇帝之世
嫡以賢以長在予一人遣使迎還徵集宗室諸王來會

合辭推戴今奉皇太后勉進之篤宗親大臣懇請之至以至順四年六月初八日即皇帝位于上都於戲惟天惟祖宗全付予有家慄慄危懼若涉淵冰罔知攸濟尚賴宗親臣鄰交修不逮以底隆平其赦天下有阿勒呼木特穆爾者明宗親臣也言於帝曰天下事重宜委宰相決之庶可責其成功若躬自聽斷則必負惡名帝信之由是深居宮中每事無所專焉辛未命巴延為太師中書右丞相上柱國監修國史兼奎章閣大學士領學

士院太史院回回漢人司天監事薩都為太傅左丞相
是月大霖雨京畿水平地丈餘饑民四十餘萬詔以鈔
四萬錠賑之涇河溢關中水災黃河大溢河南水災兩
淮旱民大饑秋七月霖雨潮州路水己亥太陰犯房宿
八月壬申鞏昌徽州山崩詔立雅克特穆爾女巴約特
氏為皇后九月甲午太陰犯填星乙未太陰犯天江甲
寅中書省臣言官員遞陞窒礙選法令請自省院臺官
外其餘不許遞陞從之丁巳太陰犯填星己未太陰犯

氏宿庚申詔太師右丞相巴延太傅左丞相薩都專理
國家大事其餘不得兼領三職秦州山崩賑恤寧夏饑
民五萬三千人一月詔免儒人役冬十月甲子太陰犯
斗宿丙寅鳳州山崩戊辰改元詔曰在昔世祖皇帝紹
開丕圖稽古建元立經陳紀列聖相承恪遵成憲肆予
冲人嗣大厯服茲圖治之云初嘉與民而更始乃新紀
號誕告多方其以至順四年為元統元年於戲一元運
於四時惟裁成之有道大統綿於萬世思保佑於無疆

中書省臣言凡朝賀遇雨請便服行禮從之己巳加知
樞密院事達爾罕達哩金紫光祿大夫庚午詔以察汗
諾爾宣慰司人民止令應當徽政院差發癸酉雲南僂
羅土官渾鄧馬弄來貢方物詔以其地陞立散府丁丑
依皇太后行年之數釋放罪囚二十七人庚辰奉文宗
皇帝及太皇太后御容於大承天護聖寺命左丞相薩
都為隆祥院使奉其祭祀乙酉詔以高郵府為巴延食
邑戊子封薩都為榮王食邑廬州騰吉斯襲父封為太

平王進階金紫光祿大夫庚寅中書省臣請集議武宗
英宗明宗三朝皇后升祔十一月辛卯朔罷富州金課
甲午太陰犯壘壁陣丙申鞏昌成紀縣地裂山崩令有
司賑被災人民丁酉享于太廟辛丑起棕毛殿丙午申
飭鹽運司辛亥江西湖廣江浙河南復立權茶運司追
謚濟雅圖皇帝為聖明元孝皇帝廟號文宗時寢廟未
建於英宗室次權結綠殿奉安神主封已延為秦王錫
金印是日秦州山崩地裂夜太陰犯太微東垣上相壬

子太陰犯填星癸丑太陰犯亢宿乙卯以雅克特穆爾
平江所賜田五百頃復賜其子騰吉斯罷河間大報恩
寺諸色人匠總管府江浙旱饑發義倉糧募富人入粟
以賑之詔秦王右丞相巴延榮王左丞相薩都統百官
總庶政十二月庚申命巴延提調彰德威武衛乙丑廣
西徭寇湖南陷道州千戶郭震戰死寇焚掠而去壬申
遣省臺官分理天下囚罪狀明者處決冤者辨之疑者
讞之淹滯者罪其有司以納喇尼都代其父達喇齊為

耽羅國軍民安撫使司達嚕嚕齊錫三珠虎符癸酉太
陰犯鬼宿甲戌圖沁特穆爾致仕錫太尉印置僚屬乙
亥為皇太后置徽政院設官屬三百六十有六員太白
犯壘壁陣太陰犯軒轅己卯太陰犯進賢癸未太陰犯
東咸

元統二年春正月庚寅朔雨血于汴梁著衣皆赤辛卯
東平須城縣濟寧濟州曹州濟陰縣水災民饑詔以鈔
六萬錠賑之以御史大夫圖卜台為中書平章政事阿

爾哈雅為河南行省左丞相丁酉享于太廟戊戌四川
大盤洞蠻謀谷什用遣男謀者什用來貢方物即其地
立盤順府命謀谷什用為知府遣吏部尚書鐵珠禮部
郎中智熙善使交趾以授時厯賜之太陰犯軒轅癸卯
勅僧道與民一體充役己酉以上文宗皇帝諡號遣官
告祭南郊庚戌太陰犯房宿甲寅罷廣教總管府立行
宣政院於杭州乙卯雲南土酋姚安路總管高明來貢
錫符印遣之二月己未朔詔內外興舉學校癸亥廣西

猺寇邊殺官吏廣海官已除而未上者罪之甲子塞北
東涼亭電民饑詔上都留守發倉廩賑之乙丑命有司
以時給宿衛冬衣以雅克布琳為太保置僚屬戊辰封
額爾勤額布根為昌寧王錫金印癸酉太陰犯太微上
相丁丑封皇姑托克托呼為英壽大長公主癸未安豐
路旱饑賑糶麥萬六千七百石甲申太廟木陛壞遣官
告祭丁亥太白經天是月灤河漆河溢永平諸縣水災
賑鈔五千錠瑞州路水賑米一萬石三月己丑朔詔科

舉取士國子學積分饒學錢糧儒人免役悉依累朝舊制學校官選有德行學問之人以充辛卯以陰陽家言罷造作四年太陰犯填星癸巳廣西徭賊復起殺同知元帥竒爾薩掠庫物遣右丞圖嚕默色將兵討之復立西番巡捕都元帥府罷廣誼司復立覆實司贈竒爾薩官令其子孫襲職庚子杭州鎮江嘉興常州松江江陰水旱疾疫勅有司發義倉糧賑饑民五十七萬二千戶癸卯月食既甲辰中書省臣言興和路起建佛事一路

所費為鈔萬三千五百三十餘錠請依上都大都例給
饒僧錢節其冗費從之乙巳中書省臣言益都真定盜
起請選省院官往督捕之仍募能擒獲者倍其賞獲三
人者與一官從之丁未以河南行省左丞相阿爾哈雅
為江浙行省左丞相壬子廣西慶遠府徭賊寇全州詔
平章政事特默齊統兵二萬人擊之丁巳詔蒙古色目
犯奸盜詐偽之罪者隸宗正府漢人南人犯者屬有司
是月山東霖雨水湧民饑賑糶米二萬二千石淮西饑

賑糶米二萬石湖廣旱自是月不雨至于八月夏四月
戊午朔日有食之庚申封宗室曼濟為文濟王乙丑命
順元等處軍民宣撫使八番等處沿邊宣慰使巴延布
哈承襲父職丙寅罷龍慶州黑峪道上雙和爾站庚午
詔雲南出征亡歿軍士人賜鈔二錠以葬壬申命騰吉
斯為總管高麗女直漢軍萬戶府達嚕噶齊與滿濟勒
噶台並為御史大夫丁丑太白經天戊寅太白晝見己
卯奉聖明元孝皇帝文宗神主祔于太廟躬行告祭之

禮樂用宮懸禮三獻先是御史臺臣言郊廟國之大典王者必行親祀之禮所以盡尊尊親親之誠宜因升祔有事于太廟帝從之是日罷夏季時享詔加榮王左丞相薩都開府儀同三司上柱國錄軍國重事食邑廬州復立杭州四隅錄事司太白晝見壬午復如之帝嘉許衡輔世祖以不殺一天下特錄其孫從宗為章佩監異珍庫提點癸未立鹽局于京師南北城官自賣鹽以革專利之弊乙酉中書省臣言佛事布施費用太廣以世

祖時較之歲增金三十八錠銀二百三錠四十兩繒帛
六萬一千六百餘疋鈔二萬九千六百五十餘錠請除
累朝期年忌日之外餘皆罷從之是月車駕時巡上都
益都東平路水設酒禁大名路桑麥災成州旱饑詔出
庫鈔發常平倉米賑之河南旱自是月不雨至于八月
五月己丑詔威武西寧王額格伯之子伊勒噶克齊襲
其父封官者博羅特穆爾傳皇后旨取鹽一十萬引入
中政院辛卯以騰吉斯代薩都為中書左丞相薩都仍

商量中書省事壬辰命中書平章政事薩題領蒙古國
子監癸巳罷洪教提點所戊申詔文濟王曼濟鎮大名
雲南王阿魯鎮雲南給銀字團牌是月中書省臣言江
浙大饑以戶計者五十九萬五百六十四請發米六萬
七百石鈔二千八百錠及募富人出粟發常平義倉賑
之并存海運糧七十八萬三百七十石以備不虞從之
詔王侯宗戚軍站人匠鷹坊控鶴但隸京師諸縣者令
所在一體役之贈故中書平章政事王泰亨謚清憲舊

令三品以上官立朝有大節及有大功勳於王室者得
賜功臣號及謚時寢冗濫失實惟泰亨在中書時安南
請佛書乞以九經賜之使高麗不受禮遺為尚書貧不
能自給故特賜是謚贈漳州萬戶府知事闕文興英毅
侯妻王氏貞烈夫人廟號雙節六月丁巳朔中書省臣
言雲南大理中慶諸路曩因圖沁布呼反叛民多失業
加以災傷民饑請發鈔十萬錠差官賑恤從之戊午淮
河漲淮安路山陽縣滿浦清岡等處民畜房舍多漂溺

丙寅宣德府水災出鈔二千錠賑之乙亥騰吉斯辭左丞相不拜復命薩都為左丞相辛巳詔蒙古色目人行親喪癸未復立繕工司造繒帛乙酉贈雅克特穆爾公忠開濟弘謨同德翊運佐命功臣開府儀同三司太師中書右丞相追封德王謚忠武是月彰德雨白毛大寧廣寧遼陽開元瀋陽懿州水旱蝗大饑詔以鈔二萬錠遣官賑之秋七月丁亥戒陰陽人毋得於貴戚之家妄言禍福辛卯祭太祖太宗睿宗三朝御容罷秋季時享

壬辰帝幸大安閣是日宴侍臣於奎章閣甲午太白晝
見己亥太白經天壬寅詔蒙古色目人犯盜者免刺甲
辰太白經天丙午復如之帝幸楠木亭己酉太白晝見
夜有流星大如酒盃色赤長五尺餘光明燭地起自天
津没于離宮之南庚戌太白經天壬子復如之夜熒惑
犯鬼宿癸丑甲寅太白復經天是月池州青陽銅陵饑
發米一千石及募富民出粟賑之八月丙辰朔太白經
天凡四日戊午祭社稷癸亥太白經天丙寅至戊辰太

白復經天辛未赦天下京師地震雞鳴山崩陷為池方
百里人死者甚衆自是日至甲戌太白經天丁丑己卯
復如之夜犯軒轅庚辰至壬午太白復經天癸未中書
平章政事阿爾哈雅罷是月南康路諸縣旱蝗民饑以
米十二萬三千石賑糶之九月庚寅太白經天辛卯車
駕還自上都壬辰太陰入南斗癸巳太白犯靈臺甲午
太白經天徭賊陷賀州發河南江浙江西湖廣諸軍及
八番義從軍命廣西宣慰使都元帥章巴延將以擊之

乙未太白經天己亥壬寅復如之乙巳太白犯太微垣
壬子吉安路水災民饑發糧二萬石賑糶夜太白犯太
微垣冬十月乙卯朔正內外官朝會儀班次一依品從
戊午享于太廟辛酉以待御史許有壬為中書參知政
事癸亥太白犯太微上相復犯進賢丁卯立湖廣黎兵
屯田萬戶府統千戶一十三所每所兵千人屯戶五百
皆土人為之官給田土牛種農器免其差徭又勅立武
安縣移石山寨巡檢司於清水寨立霍邱縣淮陰鄉臨

水山巡檢司改乾寧軍民安撫司曰乾寧安撫司乙亥
太陰犯軒轅太白犯填星己卯奉玉冊玉寶上皇太后
尊號曰贊天開聖仁壽徽懿昭宣皇太后詔曰朕登大
寶君臨萬方永惟大母擁佑之勤神器奠安海宇寧謐
實慈訓之致然也爰協衆議再舉徽稱而皇太后以文
宗皇帝未祔于廟至誠謙抑弗賜俞允今告祔禮成亦
既閱歲始徇所請乃以吉日奉上尊號思與普天同茲
大慶其赦天下免今年民租之半內外官四品以下減

一資却天鵝之獻癸未命臺憲部官各舉材堪守令者
一人十一月戊子中書省臣請發兩艘船下番為皇后
營利濟南萊蕪縣饑罷官冶鐵一年辛卯賜行宣政院
廢寺鈔一千錠以營公廨乙未填星犯亢宿庚戌熒惑
犯太微垣是月鎮南王博囉布哈來朝十二月立道州
永明縣白面墟江華縣濤墟巡檢司各一以鎮遏猛賊
甲戌詔整治學校是歲禁私勅寺觀庵院僧道入錢五
十貫給度牒方出家

至元元年春正月癸巳申命廉訪司察郡縣勸農官勤
惰達大司農司以憑黜陟乙未立徽政院屬官侍正府
丙午雲南婦人一產三男二月甲寅朔革冗官乙卯車
駕將田于柳林御史臺臣諫曰陛下春秋鼎盛宜思文
皇付托之重致天下於隆平况今赤縣之民供給繁勞
農務方興而馳騁冰雪之地倘有銜槭之變奈宗廟社
稷何遂止丁巳立縹甸散府一移由甸范陵甸軍民長
官司二以薊州寶坻縣稻田提舉司所轄田土賜巴延

戊午祭社稷甲戌熒惑逆行入太微己卯以上皇太后冊寶遣官告祭天地三月癸未朔詔遣五府官決天下囚御史臺臣言丞相已領軍國重事省院臺官俱不得兼領各衛從之平伐都雲定雲酋長寶郎天都蟲等來降即其地復立宣撫司參用其土酋為官辛卯以上皇太后寶冊遣官告祭太廟壬辰河州路大雪十日深八尺牛羊駝馬凍死者十九民大饑丙申中書省臣言甘肅甘州路十字寺奉安世祖皇帝母布濟克太后御容

請定祭禮從之丁酉以霑益州所轄羅山石梁交水三
縣并歸巡檢司月食己亥龍興路饑出糧九萬九千八
百石賑之庚子御史臺臣言高麗為國首效臣節而近
年屢遣使往選取媵妾至使生女不舉女長不嫁乞賜
禁止從之中書省臣言帝生母太后神主宜於太廟安
奉命集議其禮甲辰山東河間兩淮福建四處增鹽課
一十八萬五千引中書請權罷徵止令催辦正額乙巳
以中書左丞王結參知政事許有壬知經筵事封安南

世子陳端午為安南國王是月益都路沂水日照蒙陰
莒縣旱饑賑米一萬石夏四月癸丑朔詔諸官非節制
軍馬者不得佩金虎符辛酉享于太廟以江南行御史
臺中丞布哈為中書省參知政事壬戌太陰犯左執法
丙寅以鈔五十萬錠命徽政院散給達勒達俄羅斯集
賽台各愛滿己巳加騰吉斯開府儀同三司己卯詔翰
林國史院纂修累朝實錄及后妃功臣列傳庚辰罷功
德典瑞營繕集慶翊正羣玉繕工金玉珠翠諸提舉司

以薩題為御史大夫禁犯御名是月河南旱賑恤芍陂
屯軍糧兩月五月壬午朔皇太后以膺受寶冊恭謝太
廟丙戌占城國遣其臣刺忒納兀兒撒來獻方物且言
交趾過其貢道詔遣使宣諭交趾戊子車駕時巡上都
遣使者詣曲阜孔子廟致祭加巴咱爾金紫光祿大夫
壬辰命嚴謚法以絕冒濫京畿民饑詔有司議賑恤癸
卯太陰犯壘壁陣甲辰巳延請以右丞相讓騰吉斯詔
不允命騰吉斯為左丞相是月永新州饑賑之六月辛

酉有司言甘肅實喇威產金銀請遣官稅之壬戌太陰
犯心宿癸酉禁服色不得僭上乙亥罷江淮財賦總管
府所管杭州平江集慶三處提舉司以其事歸有司詔
湖南宣慰使司兼都元帥府總領所轄諸路鎮守軍馬
庚辰巴延奏騰吉斯及其弟塔喇海謀逆誅之幽皇后
巴約特氏大霖雨秋七月辛巳朔以滿濟勒噶台阿恰
齊並為御史大夫壬午巴延弒皇后巴約特氏于開平
民舍丁亥享于太廟壬辰加滿濟勒噶台銀青榮祿大

夫開府儀同三司領承徽寺乙未太陰犯壘壁陣壬寅
專命巴延為中書右丞相罷左丞相不置癸卯立托克
托和斯於察汗諾爾之地乙巳罷雅克特穆爾騰吉斯
舉用之人戊申誅達哩及拉拉等詔曰曩者文宗皇帝
以雅克特穆爾嘗有勞伐父子兄弟顯列朝廷而輒造
事釁出朕遠方文皇尋悟其妄有旨傳次于予雅克特
穆爾貪利幼弱立朕弟伊埒哲伯不幸崩殂今丞相巴
延追奉遺詔迎朕于南既至大都雅克特穆爾猶懷兩

端遷延數月天隕厥躬巴延等同時翊戴乃正宸極後
薩都達哩騰吉斯相襲用事交通宗王鴻和特穆爾圖
危社稷阿恰齊亦嘗與謀賴巴延等以次掩捕明正其
罪元凶構難貽我皇太后震驚朕用兢惕永惟皇太后
後其所生之子一以至公為心親挈大寶昇予兄弟迹
其定策兩朝功德隆盛近古罕比雖嘗奉上尊號揆之
朕心猶為未盡已命大臣特議加禮巴延為武宗捍禦
北邊翼戴文皇茲又克清大慙明飭國憲爰賜達爾罕

之號至于子孫世世永賴可赦天下是月西和州徽州
雨雹民饑發米賑之八月辛亥朔癸惑犯氐宿戊午祭
社稷癸亥以岐陽王鄂勒哲特穆爾知樞密院事特穆
爾布哈並為御史大夫甲子加鄂勒哲特穆爾太傅戊
寅道州永興水災發米五千石及義倉糧賑之己卯議
尊皇太后為太皇太后許有壬諫其非禮不從是月廣
西徭反命湖廣行省右丞鄂勒哲討之沅州等處民饑
賑米二萬七千七百石九月庚辰朔車駕駐柅孤嶺丙

戊赦丁亥封知樞密院事竒爾濟蘇為宜國公太保中
書平章政事鼎珠為宣德王夜太陰犯斗宿庚寅太陰
犯壘壁陣庚子加中書平章政事徹爾特穆爾銀青榮
祿大夫命有司造太皇太后玉冊玉寶御史臺臣言國
朝初用宦官不過數人今內府執事不下千餘乞依舊
制裁減冗濫廣仁愛之心省糜費之患從之丙午詔以
烏撒烏蒙之地隸四川行省是月耒陽常寧道州民饑
以米萬六千石并常平米賑糶之車駕還自上都以京

畿鹽換羊二萬口冬十月甲寅熒惑犯南斗丙辰以大
司農塔斯哈雅為太尉置僚屬商議中書省事丁巳以
達實特穆爾為太禧院使議軍國重事流鴻和特穆爾
達哩騰吉斯子孫於邊地詔海道都漕運萬戶府船戶
與民一體充役壬戌加御史大夫特穆爾布哈銀青榮
祿大夫癸亥流御史大夫鄂勒哲特穆爾於廣海安置鄂
勒哲特穆爾乃賊臣額森特穆爾骨肉之親御史以為
言故斥之選省院臺宗正府通練刑獄之官分行各道

與廉訪司審決天下囚甲子太陰犯昴宿丁卯太陰犯
斗宿戊辰太白晝見以宗王伊蘇格爾弟薩奇襲其兄
封監察御史呂思誠等十九人劾奏徹爾特穆爾之罪
不聽皆辭去惟陳允文以不署名留辛未太皇太后玉
冊玉寶成遣官告祭于太廟是月以巴延獨任中書右
丞相詔天下十一月庚辰勅以所在儒學貢士莊田租
給宿衛衣糧詔罷科舉甲申太白經天乙酉巴延請內
外官悉循資銓注今後無得保舉滯選法從之丙戌太

白經天己丑辰星犯房宿癸巳命知樞密院事滿濟勒
噶台領武備寺甲午以雅克特穆爾騰吉斯達哩所奪
高麗田宅還其王喇特納實哩丁酉以戶部尚書徐奭
吏部尚書鼎珠參議中書省事戊戌召前知樞密院事
布敦實喇布哈實喇德格還京初二人以帝未立謀誅
雅克特穆爾為所誣貶故正之己亥太陰犯太微垣庚
子太陰犯左執法辛丑下詔改元詔曰朕祇紹天明入
纂丕緒于今三年夙夜寅畏罔敢怠荒茲者年穀順成

海宇清謐朕方增修厥德日以敬天恤民為務屬太史
上言星文示儆將朕德菲薄有所未逮歟天心仁愛俾
予以治有所告戒歟弭災有道善政為先更號紀年實
惟舊典惟世祖皇帝在位長久天人協和諸福咸至祖
述之志良切朕懷今特改元統三年仍為至元元年適
遵成憲誕布寬條庶格禎祥永綏景祚赦天下立常平
倉丁未賜知樞密院事徹爾特穆爾三珠虎符十二月
己酉朔荆門州獻紫芝以廩給司屬通政院加知樞密

院事竒爾濟蘇銀青榮祿大夫兼左翊蒙古侍衛親軍
都指揮使壬子太陰犯壘壁陣乙卯命雲南行省造軍
士錢糧新舊之籍丙辰制省諸王公主駙馬飲饍之費
詔徵高麗國王喇特納實哩入朝丁巳詔巴延領宮相
府戊午日赤如赭辛酉太白犯壘壁陣壬戌撥廬州饒
州牧地一百頃賜宣讓王特穆爾布哈命四川雲南江
西行省保選蠻夷官以俟銓注乙丑奉玉冊玉寶上太
皇太后尊號曰贊天開聖徽懿昭宣貞文慈佑儲善行

慶福元太皇太后詔曰欽惟太皇太后承九廟之托啟
兩朝之業親以大寶付之眇躬尚依擁佑之慈恪遵仁
讓之訓爰極尊崇之典以昭報本之忱庸上徽稱宣告
中外命宣政院使摩濟以司徒就第太白犯軒轅夫人
星丙寅太白經天丁卯復如之夜太陰犯右執法庚午
太白經天壬申復如之癸酉歲星晝見乙亥太白歲星
皆晝見丙子安慶蘄黃地震丁丑西番賊起遣兵擊之
戊寅蒙古國子監成是日太白經天歲星晝見是月寶

慶路饑賑糶米三千石閏月乙酉詔四川鹽運司於鹽井仍舊造鹽餘井聽民煮造收其課十之三熒惑犯壘壁陣丁亥日赤如赭凡三日戊子復以宗正府為大宗正府壬辰詔宗室托克托穆爾襲封荆王賜金印命掌莽賚諸軍設立王府官屬丁酉御史大夫薩題加銀青榮祿大夫領奎章閣知經筵事戊戌御史臺臣復劾奏中書平章政事徹爾特穆爾罪罷之庚子太陰犯心宿壬寅流徹爾特穆爾於南安太陰犯箕宿癸卯太陰犯

南斗丙午詔平章政事塔斯哈雅領都水度支二監是
歲江西大水民饑賑糶米七萬七千石賜天下田租之
半凡有妻室之僧令還俗為民既而復聽為僧移榷為
縣還舊治

元史卷三十八

元史卷三十八考證

薩敦為太傅左丞相 原刻作右丞相考元史類編是
時復設左丞相以薩敦為之且巴延已為右相則薩
敦為左相無疑永樂大典亦同今據改

奉文宗皇帝及太皇太后御容于大承天護聖寺

按此云太皇太后未詳何人武宗三后御容已奉安
于大崇恩福元寺及普慶寺且生前並未膺尊號至
文宗后稱太皇太后在至元元年且太后現存不應

先與文宗同祭史無明文今識以闕疑

立行宣政院于杭州 原刻不載其地于事實未明據

百官志增

中書平章政事阿里哈雅罷 按阿里哈雅已於正月
除河南行省丞相宰相表亦同三月復自河南改江
浙行省左丞相是阿里哈雅之去中書久矣此處又
書其罷平章政事殊為舛駁


丁酉月食 按月食史例不書獨此卷至四十一卷載

之與前後本紀體例皆不符今仍原文而于初見處
附識其誤

貽我皇太后震驚 原刻作太皇后按是時尚未加尊
號應止稱皇太后今據元史類編改

丙戌太白經天己丑辰星犯房宿 原刻誤在癸巳一
條之下今按甲子改正

上太皇太后尊號曰贊天開聖徽懿昭宣 原刻訛宣
詔考永樂大典作宣昭今據元統二年本紀文改



欽定四庫全書薈要卷六千四百十八 史部

元史卷三十九

明翰林學士亞中大夫知制誥兼修國史宋濂等修

本紀第三十九

順帝二

二年春正月壬戌太陰犯右執法甲子太陰犯角宿乙
丑宿松縣地震山裂丁卯太陰犯房宿是月置都水庸
田使司于平江二月戊寅朔祭社稷辛巳太陰犯昴宿

甲申太白經天戊子詔以世祖所賜王積翁田八十頃
還其子都中初積翁齋詔諭日本死于王事嘗受賜後
收入官故復賜之己丑立穆陵關巡檢司壬辰日赤如
赭乙未丙申復如之丁酉追尊帝生母瑪里達為貞裕
徽聖皇后庚子分衡州路衡陽縣立新城縣進封宣靖
王邁努為益王甲辰宗王伊克札爾古齊添孫薨賜鈔
一百錠以葬乙巳詔賞勞廣海征徭將卒有官者升散
階歿于王事者優加褒贈金山甘肅兵士在逃者聽復

業免其罪三月戊申以阿爾哈雅家藏書畫賜巴延甲寅以昂輝為大宗正府伊克札爾古齊總掌天下奸盜詐偽丁巳以累朝御服朱衣七寶項牌賜巴延庚申日赤如赭壬戌復如之賜征東元帥府軍士冬衣及甲諸軍討廣西徭人無功勅行省行臺廉訪司官共督之順州民饑以鈔四千錠賑之夜太陰犯心宿癸亥日赤如赭甲子太陰犯箕宿乙丑太陰犯南斗賜宗王和爾和母達哩鈔一千錠以薩都上都居第賜太保鼎珠仍勅

有司籍薩都家財甲戌復四川鹽井之禁以諳達穆爾
家人田宅賜太保鼎珠以旺嘉努為宣政院使加金紫
光祿大夫造武宗英宗明宗三朝皇后玉冊玉寶是月
陝西暴風旱無麥夏四月丁丑朔日赤如赭禁民間私
造格例戊寅封駙馬博囉特穆爾為毓德王丙戌太陰
犯角宿丁亥禁服麒麟鸞鳳白兔靈芝雙角五爪龍八
龍九龍萬壽福壽字赭黃等服庚寅以知樞密院事特
穆爾布哈為中書平章政事薩題為御史大夫甲午遣

使以香幣賜武當龍虎二山以太平路為邾王齊齊克
圖食邑以集慶廬州饒州托克托呼民戶賜巴延仍于
句容縣設長官所領之戊戌車駕巡上都拜中書左丞
耿煥為侍御史王德懋為中書左丞賜宗室呼喇王金
一錠鈔一千錠毓德王博羅特穆爾鈔三千錠公主巴
拜鈔二千錠五月丙午朔黃河復于故道庚戌太陰犯
靈臺乙卯南陽鄧州大霖雨自是日至于六月甲申湍
河白河大溢水為災丙辰太白晝見丁巳亦如之壬申

秦州山崩是月婺州不雨至于六月六月丁丑禁諸王
駙馬從衛服濟遜衣繫條環贈宗王呼圖克岱爾為雲
安王謚忠武羅壘丹為保寧王謚昭勇庚辰命中書平章
政事昂吉爾知經筵事戊子以特穆爾布哈為江浙行
省左丞相太白犯井宿辛卯以汴梁大名諸路圖卜台
地土賜巴延禮部侍郎呼喇台請復科舉取士之制不
聽庚子涇水溢辛丑以鈔五千錠賜吳王吹斯戩秋七
月丙午以公主努爾伊齊森之地五千頃賜巴延以衛

輝路賜衛王庫春格爾為食邑己酉太白犯鬼宿庚戌
以鼎珠索諾木參議中書省事壬子發阿嚙罕布呼齊
駱駝一百一十供太皇太后乘輿之用乙卯太白犯熒
惑庚申禁隔越中書口傳勅旨冒支錢糧甲子命有司
以所籍薩都寶器分賜巴延及太保鼎珠乙丑中書平
章政事博囉徙宅賜金二錠銀十錠庚午勅賜上都孔
子廟碑載累朝尊崇之意省諸王公主駙馬從衛糧賜
之數癸酉命宗王布呼齊駙馬伊魯布哈特古斯嘉琿

鎮蘇魯克吉魯爾之地各賜鈔六百錠及銀牌遣之是月黃州蝗督民捕之人日五斗以鈔二千錠賑新收阿蘇軍扈從車駕者每戶鈔二錠死者人一錠八月甲戌朔日有食之高郵大雨雹詔雲南廣海八番及甘肅四川邊遠官死而不能歸葬者有司給糧食舟車護送還鄉去鄉遠者加鈔二十錠無親屬者官為瘞之命威順王庫春布哈還鎮湖廣先是巴延矯制召之至京至是帝遣歸藩戊寅祭社稷大都至通州霖雨大水勅軍人修

道己卯太陰犯心宿辛巳太陰犯箕宿辛卯以徽政院
中政院財賦府田租六萬三千三百石補本年海運未
數之數令有司歸其直壬辰立屯衛于滿濟勒噶之地
庚子詔強盜皆死盜牛馬者劓盜驢騾者黥額再犯劓
盜羊豕者墨項再犯黥三犯劓劓後再犯者死盜諸物
者照數估價省院臺五府官三年一次審決著為令辛
丑減馬湖路泥溪平夷蠻夷都沐川雷坡六長官司
併為三九月庚戌熒惑犯太微垣癸亥弛鞏昌總帥府

漢人軍器之禁戊辰車駕還自上都海運糧至京遣官
致祭天妃是月台州路饑發義倉募富人出粟賑之沅
州路廬陽縣饑賑糶米六千石冬十月丙子熒惑犯左
執法己卯享于太廟丙申命參知政事納琳監繪明宗
皇帝御容丁酉太陰犯昴宿己亥詔每日右丞相巴延
太保鼎珠中書平章政事博囉昂吉爾聚議于內廷平
章政事塔斯哈雅右丞衮布巴勒參知政事納琳許有
壬等聚議于中書太陰犯進賢是月撫州袁州瑞州諸

路饑發米六萬石賑糶之十一月己酉太陰犯壘壁陣
壬子以諾海為湖廣行省平章政事討廣西叛獠武宗
英宗明宗三朝皇后升祔入廟命官致祭丁巳遣河南
行省平章政事伊嚕布哈于西番為僧己未太陰犯壘
壁陣辛酉賜宣讓王特穆爾布哈市宅錢四千錠詔特
穆爾布哈王府官屬朝賀班次列于有司之右壬戌命
同知樞密院事濟延布哈兼宮相都總管府達嚕噶齊
領隆鎮衛左阿蘇衛諸軍癸亥安置宗王布呼齊于梧

州丁卯太陰犯房宿辛未禁彈弓弩箭袖箭壬申國公
邁珠卒賜鈔三百錠印造至元三年鈔本一百五十萬
錠是月松江府上海縣饑發義倉糧及募富人出粟賑
之安豐路饑賑糶麥四萬二千四百石十二月甲戌日
赤如赭丙子命興元府鳳州留壩鎮及晉寧路遼山縣
十八盤各立巡檢司宗王伊蘇特穆爾進西馬三匹賜
文濟王曼濟金印驛券及從衛者衣并糧五千石詔省
院臺翰林集賢奎章閣太常禮儀院禮部官定議寧宗

皇帝尊謚廟號是月江州諸縣饑總管王大中貸富人粟以賑貧民而免富人雜徭以為息約年豐還之民不病饑慶元慈溪縣饑遣官賑之是歲詔整治驛傳以甘肅行省白城子屯田之地賜宗王納古爾以雅克特穆爾宅賜灌頂國師納木喀僧格號大覺海寺塑千佛于內江浙旱自春至于八月不雨民大饑

三年春正月癸卯廣州增城縣民朱光卿反其黨石昆山鍾大明率衆從之偽稱大金國改元赤符命指揮噶

北爾江西行省左丞實迪討之戊申大都南北兩城設
賑糶米鋪二十處辛亥升祔伊埒哲伯皇帝于太廟謚
沖聖嗣孝皇帝廟號寧宗豫王喇特納實哩買池州銅
陵產銀地一所請用私財煅煉輸納官課從之癸丑立
宣鎮侍衛屯田萬戶府于寧夏丙辰月食丁巳日有交
暈左右珥上有白虹貫之戊午帝獵于柳林凡三十五
日監察御史綽台宋紹明進諫帝嘉納之賜金幣綽台
等固辭帝曰昔魏徵進諫唐太宗未有不賞汝其受之

是月臨江路新淦州新喻州瑞州民饑賑糶米二萬石
封晉郭璞為靈應侯二月壬申朔日有食之棒胡反于
汝寧信陽州棒胡本陳州人名閨兒以燒香惑衆妄造
妖言作亂破歸德府鹿邑焚陳州屯營于杏岡命河南
行省左丞慶通領兵討之紹興路大水丙子立船戶提
舉司十處提領二十處定船戶科差船一千料之上者
歲納鈔六錠以下遞減壬午以上太皇太后玉冊玉寶
恭謝太廟甲申定服色器皿輿馬之制己丑汝寧獻所

獲棒胡彌勒佛小旗偽宣勅并紫金印量天尺辛卯發鈔四十萬錠賑江浙等處饑民四十萬戶開所在山場河泊之禁聽民樵採廣西徭賊復反命湖廣行省平章諾海江西行省平章圖魯默色哈雅總兵捕之丙申太保鼎珠薨給賜殯葬諸物庚子中書參政納琳等請立採珠提舉司先是常立提舉司泰定間以其煩擾罷去至是納琳請復立之且以採珠戶四萬賜巴延是月發義倉米賑蘄州及紹興饑民三月辛亥太陰犯靈臺發

鈔一萬錠賑大都寶坻饑民戊午以玉寶玉冊立鴻吉
哩氏巴延呼圖克為皇后因雨輟賀以諤勒哲特穆爾
蘇州之田二百頃賜郊王齊齊克圖己未大都饑命于
南北兩城賑糶糙米癸亥加封晉周處為英義武惠正
應王乙丑命宗王雅克特穆爾為大宗正府札爾古齊
是月天雨線發義倉糧賑溧陽州饑民六萬九千二百
人夏四月壬申遣使降香于龍虎三茅閣皂諸山癸酉
禁漢人南人高麗人不得執持軍器凡有馬者拘入官

甲戌有星孛于王良至七月壬寅沒于貫索皇后以受
玉冊玉寶恭謝太廟命已延領宣鎮侍衛軍賜鈔三千
錠建宣鎮侍衛府以太皇太后受冊寶詔天下己卯車
駕時巡上都壬午高麗王喇特納實哩朝賀還國賜金
一錠鈔二千錠從官賜與有差辛卯合州大足縣民韓
法師反自稱南朝趙王太陰犯壘壁陣丁酉諡唐杜甫
為文貞己亥惠州歸善縣民聶秀卿譚景山等造軍器
拜戴甲為定光佛與朱光卿相結為亂命江西行省左

丞實迪捕之庚子太白晝見是月詔省院臺部宣慰司
廉訪司及部府幕官之長並用蒙古色目人禁漢人南
人不得習學蒙古色目文字以米八千石鈔二千八百
錠賑哈喇努爾饑民龍興路南昌新建縣饑太皇太后
發徽政院糧三萬六千七百七十石賑糶之五月辛丑
民間訛言朝廷拘刷童男童女一時嫁娶殆盡壬寅太
白犯鬼宿癸卯給平伐都雲定雲二處安撫司達嚕噶
齊溫都爾等虎符乙巳以興州松州民饑禁上都興和

造酒太陰犯軒轅戊申詔汝寧棒胡廣東朱光卿聶秀
卿等皆係漢人漢人有官于省臺院及翰林集賢者可
講求誅捕之法以聞太白晝見壬子太陰犯心宿甲寅
詔哈馬爾圖及圖沁特穆爾為太尉各設僚屬幕官西
番賊起殺鎮西王子丹巴詔立行宣政院以額森特穆
爾為院使往討之戊午太白晝見己未太陰犯壘壁陣
辛酉太白晝見壬戌命四川行省參知政事吉里等捕
反賊韓法師丁卯彗星見于東北大如天船星色白約

長尺餘彗指西南至八月庚午始滅六月庚午太白經
天辛未甲戌復如之乙亥太白犯靈臺戊寅贈丞相安
圖推忠佐運開國元勳東平忠憲王於所封城內建立
祠廟官為致祭己卯太白經天夜太白犯太微垣辛巳
大霖雨自是月至癸巳不止京師河南北水溢御河黃
河沁河渾河水溢没人畜廬舍甚衆壬午太白晝見太
陰犯斗宿癸未設醮長春宮丁亥太白犯太微垣戊子
加封文始尹真人為無上太初博文文始真君徐甲為

垂玄感聖慈化應御真君庚桑子洞靈感化超蹈混然
真君文子通玄光暢昇元敏秀真君列子冲虛至德遁
世遊樂真君莊子南華至極雄文宏道真君己丑太白
晝見庚寅復如之至七月辛酉方息壬辰彰德大水深
一丈立高密縣濰川鄉景芝社巡檢司秋七月己亥漳
河泛溢至廣平城下賜袞布巴勒西平王印癸卯帝出
獵太白經天乙巳復如之丙午車駕幸實喇鄂爾多太
白復經天丁未車駕幸龍岡灑馬乳以祭戊申召國王

多爾濟入朝庚戌太白晝見河南武陟縣禾將熟有蝗
自東來縣尹張寬仰天呪曰寧殺縣尹毋傷百姓俄有
魚鷹羣飛啄食之壬子車駕幸乾元寺甲寅太白經天
乙卯懷慶水庚申詔除人命重事之外凡盜賊諸罪不
須候五府官審錄有司依例決之辛酉太白晝見壬戌
賜宗王僧格巴拉七寶繫腰太白經天癸亥甲子復如
之是月噶札爾實迪擒朱光卿尋追擒石昆山鍾大明
八月戊辰祭社稷遣使賑濟南饑民九萬戶庚午彗星

不見自五月丁卯始見至是凡六十三日自昴至房凡
歷一十五宿而滅甲戌太陰犯心宿辛巳京畿盜起壬
午京師地大震太廟梁柱裂各室牆壁皆壞壓損儀物
文宗神主及御牀盡碎西湖寺神御殿壁仆壓損祭器
自是累震至丁亥方止所損人民甚衆癸未日有交暈
左右珥白虹貫之河南地震弛高麗執持軍器之禁仍
令乘馬戊子漢人鎮遏生番處亦開軍器之禁修理文
宗神主并廟中諸物是月車駕至自上都九月己亥熒

惑犯斗宿甲辰太白犯斗宿丁未太陰犯壘壁陣己酉
立皮貨所于寧夏設提領使副主之立四川湖廣江西
江浙行樞密院文宗新主玉冊及一切神御之物皆成
詔依典禮祭告太陰犯壘壁陣辛亥太陰犯軒轅丙寅
大都南北兩城添設賑糶米鋪五所冬十月庚午太白
晝見癸酉日赤如赭乙亥命江浙行省丞相吹斯戩提
調海運丙子太陰犯壘壁陣壬午太陰犯昴宿丁亥太
白晝見太陰犯鬼宿庚寅太白晝見辛卯亦如之丙申

復如之十一月丁酉太白經天戊戌太白犯亢宿己亥
太白經天壬寅太陰犯熒惑癸卯太陰犯壘壁陣丙午
立屯田于雄州丁未填星犯鍵閉辛亥太白犯五車甲
寅太白犯鬼宿丙辰太陰犯軒轅丁巳太白經天太陰
犯太微垣詔托克托穆爾襲托和齊荆王位命其妃呼
魯古爾同治俄羅斯事戊午太白經天癸亥發鈔萬五千
錠賑宣德等處地震死傷者太白經天甲子乙丑復如
之十二月己巳享于太廟歲星退犯天罇填星犯罰星

甲戌熒惑犯壘壁陣太白犯東咸乙亥吏部仍設考功
郎中員外郎主事各一員庚辰命阿魯圖襲廣平王爵
壬午集賢大學士英格等言太上皇唐妃影堂在真定
玉華宮每年于正月二十日致祭從之丙戌命阿蘇衛
特默齊軍屯田是月以滿濟勒噶台為太保分樞密院
鎮北邊是歲詔賜孝子靳曷碑巴延請殺張王劉李趙
五姓漢人帝不從徵西域僧桑結喇嘛至京師號灌頂
國師賜玉印

四年春正月丙申以地震赦天下詔內外廉能官父母
年七十無侍丁者附近銓注以便侍養以宣政院使布
呼齊年七十致仕授大司徒給全俸終身癸卯太白犯
建星甲辰復如之丙午太白犯五車辛亥太陰犯軒轅
己未填星犯東咸江浙海運糧數不足撥江西河南五
十萬石補之庚申太陰入南斗太白犯牛宿辛酉分命
宗王奈瑪岱為知行樞密院事癸亥印造鈔本百二十
萬錠是月詔修孔子曲阜廟二月丁卯罷河南江西江

浙湖廣四川等處行樞密院戊辰祭社稷庚午車駕獵于柳林戊寅太陰犯軒轅己卯太陰犯靈臺乙酉奉聖州地震是月賑京師河南北被水災者龍興路南昌州饑以江西海運糧賑糶之三月戊申填星退犯東咸辛酉命中書平章政事昂吉爾監修至正條格告祭南郊以國王多爾濟為遼陽行省左丞相宗王伊埒布哈為知樞密院事賜鈔一千錠金一錠銀十錠夏四月辛未京師天雨紅沙晝晦以特默齊珠爾噶岱為中書平章

政事癸酉以托克托為御史大夫乙亥命昂吉爾為奎
章閣大學士知經筵事己卯車駕巡上都河南執棒胡
至京師誅之癸巳車駕薄暮至八里塘雨雹大如拳其
狀有小兒環玦獅象龜卵之形五月乙未立五臺山等
處巡檢司庚戌升兩淮屯田打捕總管府為正三品甲
寅贈湖廣行省平章政事雅竒推誠翊戴安邊制勝功
臣太傅開府儀同三司上柱國追封永平王諡忠襄辛
酉詔土番宣慰司軍士許令乘馬執兵器湖廣行省元

領新化洞古州潭溪龍里洪州諸洞三百餘處洞民六
萬餘戶分隸靖州立敘南橫江巡檢司是月命佛嘉律
為考功郎中喬林為考功員外郎魏宗道為考功主事
考較天下郡縣官屬功過命昂吉爾復為中書平章政
事彰德獻瑞麥一莖三穗臨沂費縣水發米三萬石賑
糶之六月庚午廣東廉訪司僉事阿木察言處決重囚
宜命五府官斟酌地理遠近預選官分行各道比到秋
分時畢事從之辛巳袁州民周子旺反僭稱周王偽改

年號尋擒獲伏誅填星退犯鍵閉壬午立重慶路墊江縣已丑邵武路大雨水入城郭平地二丈是月信州路靈山裂漳州路南勝縣民李志甫反圍漳城守將吹斯戩與戰失利詔江浙行省平章拜布哈總浙閩江西廣東軍討之秋七月壬寅詔以巴延有功立生祠于涿州汴梁己酉奉聖州地大震損壞人民廬舍丙辰鞏昌府山崩壓死人民戊午為巴延立打捕鷹房諸色人戶總管府八月癸亥朔日有食之戊辰祭社稷己巳申取高

麗女子及閹人之禁贈巴延徹爾守誠佐治安惠世美
功臣太師開府儀同三司上柱國追封奉元王諡忠宣
辛未宣德府地大震癸酉山東鹽運司于濟南歷城立
濱洛鹽倉東西二場丙子京師地震日二三次至乙酉
乃止丁酉白虹貫天癸未改宣德府為順寧府奉聖州
為保安州贈太保庫春推忠翊運保寧一德功臣太師
開府儀同三司上柱國追封廣陽王諡忠惠贈平章拜
特穆爾宣忠濟美協誠正德功臣太傅開府儀同三司

上柱國追封文安王諡忠憲甲申雲南老告土官八那
遣姪那賽齋象馬來朝為立老告軍民總管府是月車
駕還自上都閏八月戊戌日赤如赭己亥復如之填星
犯罰星太陰犯斗宿壬寅日赤如赭庚戌太陰犯斗宿
乙卯太陰犯鬼宿九月丙寅太陰犯斗宿戊辰太白犯
東咸癸酉奔星如盃大色白起自右旗之下西南行沒
于近濁甲申太陰犯軒轅乙酉太陰犯靈臺庚寅日赤
如赭太白犯斗宿冬十月辛卯享于太廟辛亥太陰犯

酒旗十一月丙寅改英宗殿名昭融丁卯立紹熙府軍
民宣撫都總使司御史大夫托克托兼都總使治書侍
御史吉達布為副都總使世襲其職本府元領六州二
十縣一百五十二鎮國初以其地荒而廢之至是居民
二十餘萬故立府治之乙巳命平章政事博囉領太常
禮儀院使熒惑犯氏宿丁丑太陰犯鬼宿戊寅太陰犯
壘壁陣壬午四川散毛洞蠻反遣使賑被寇人民十二
月甲午大都南城等處設米鋪二十每鋪日糶米五十

石以濟貧民俟秋成乃罷戊戌立邦牙等處宣慰司都
元帥府并總管府先是世祖既定緬地以其處雲南極
遠就立其酋長為帥令三年一入貢至是來貢故立官
府庚子熒惑犯房宿壬寅以宣徽使伯勒齊爾布哈為
御史大夫癸卯太白經天己酉復如之庚戌加荆王托
克托穆爾元德上輔廣中宣義正節振武佐運功臣太
白經天辛亥復如之壬子熒惑犯東咸乙卯太白犯外
屏太陰犯斗宿丙辰太白經天

元史卷三十九

元史卷三十九考證

減馬湖路 原刻作湖馬路按永樂大典作馬湖路宏
簡錄亦同今據改



欽定四庫全書薈要卷六千四百十九 史部

元史卷四十

明翰林學士亞中大夫知制誥兼修國史宋濂等修

本紀第四十

順帝三

五年春正月癸亥禁濫予僧人名爵庚午太陰犯井宿
乙亥熒惑犯天江濮州鄆城范縣饑賑鈔二千一百八
十錠冀寧路交城等縣饑賑米七千石桓州饑賑鈔二

千錠雲需府饑賑鈔五千錠開平縣饑賑米兩月興和
寶昌等處饑賑鈔萬五千錠二月庚寅信州雨土甲午
太陰犯昴宿戊戌祭社稷庚子免廣海添辦鹽課萬五
千引止辦元額壬寅太陰犯靈臺三月辛酉巴勒喇實
千戶所民被災遣太禧宗禋院斷事官塔海發米賑之
戊辰灤河住冬齊哩克昆民饑每戶賑糧一石鈔二十
兩夏四月辛卯革興州興安縣癸巳立巴延南口過街
塔二碑乙未加封孝女曹娥為惠感靈孝昭順純懿夫

人壬寅太陰犯日星及房宿己酉申禁漢人南人高麗
人不得執軍器弓矢是月車駕時巡上都五月己未朔
鴻和爾布拉克賽音圖布拉克尼格德呼蘇賽音布拉
克等處六愛滿民饑賑之庚午太陰犯心宿壬申太陰
犯斗宿丙子太白犯昴宿丙戌加封瀏陽州道吾山龍
神崇惠昭應靈顯廣濟侯六月壬寅月食甲辰熒惑退
入南斗庚戌汀州路長汀縣大水平地深可三丈餘沒
民廬八百家壞田二百頃戶賑鈔半錠死者一錠乙卯

達勒達民饑賑糧三月是月沂莒二州民饑發糧賑糶
之秋七月辛酉壬戌熒惑犯南斗甲子熒惑犯南斗太
陰犯房宿甲戌太白經天丙子開上都興和等處酒禁
丁丑封皇姊伊魯勒公主為昌國大長公主戊寅太白
經天詔諸王位下官母入常選甲申常州宜興山水出
勢高一丈壞民廬乙酉太白經天丙戌太白復經天八
月丁亥朔車駕至上都戊子太白經天祭社稷己丑
太白復經天庚寅宗王托歡特穆爾各愛滿民饑以鈔

三萬四千九百錠賑之宗王托羅該圖各愛滿民饑以
鈔萬一千三百五十七錠賑之太白經天辛卯太白復
經天甲午太陰犯斗宿丁酉太白犯軒轅戊戌己亥太
白經天壬寅至甲辰太白復經天乙巳太陰犯昴宿九
月丁巳瀋陽饑民食木皮賑糶米一千石戊午太白經
天己未太白復經天冬十月辛卯享于太廟壬辰禁倡
優盛服許男子裹青巾婦女服紫衣不許戴笠乘馬甲
午詔以巴延為大丞相加元德上輔功臣之號賜七寶

玉書龍虎金符己亥熒惑犯壘壁陣是月衡州饑賑糶
米五千石遼陽饑賑米五百石文登牟平二縣饑賑糶
米一萬石十一月丁巳熒惑犯壘壁陣禁宰殺戊辰開
封杞縣人范孟反偽傳旨殺河南行省平章政事伊嚕
特穆爾左丞齊喇廉訪使諤勒哲布哈等己而捕誅之
癸酉瑞州路新昌州雨水冰至明年二月始解是月八
番順元等處饑賑鈔二萬二千錠十二月辛卯復立都
水庸田使司于平江先是嘗置而罷至是復立甲午太

陰犯昴宿癸卯熒惑犯外屏是歲勅賜曲阜宣聖廟碑
工部廳梁上出芝草一本七莖袁州饑賑糶米五千石
膠密莒濰等州饑賑鈔二萬錠

六年春正月丁卯太陰犯鬼宿甲戌立司裡監奉太祖
太宗睿宗三朝御容於石佛寺乙亥太陰犯房宿戊寅
追封竒爾濟蘇宣誠戡難翊運致美功臣太師開府儀
同三司上柱國晉寧王諡忠襄是月察呼察汗諾爾等
處馬災賑鈔六千八百五十八錠邳州民饑賑米兩月

二月甲申朔詔權止今年印鈔戊子祭社稷己丑太陰
犯昴宿丙申太陰犯太微垣己亥黜中書大丞相巴延
為河南行省左丞相詔曰朕踐位以來命巴延為太師
秦王中書大丞相而巴延不能安分專權自恣欺朕年
幼輕視太皇太后及朕弟雅克特古斯變亂祖宗成憲
虐害天下加以極刑允合輿論朕念先朝之故尚存憫
恤今命巴延出為河南行省左丞相其元領諸衛親軍
并集賽台人等詔書到即許散還以太保滿濟勒噶台

為太師中書右丞相太尉塔斯哈雅為太傅知樞密院
事塔瑪齊為太保御史大夫托克托為知樞密院事旺
嘉努為中書平章政事嶺北行省平章政事額森特穆
爾為御史大夫增設京城米鋪從便賑糶壬寅詔除知
樞密院事托克托之外諸王侯不得佩弓箭環刀輒入
內府癸卯太陰犯心宿乙巳罷各處船戶提舉廣東採
珠提舉二司丁未太陰犯羅堰立延徽寺以奉寧宗祀
事罷司裡監罷通州河西務等處抽分按利房大都東

裏山查提領所戊申熒惑犯月星己酉彗星見如房星
大色白狀如粉絮尾跡約長五寸餘指西南漸向西北
行是月福寧州大水溺死人民京畿五州十一縣水每
戶賑米兩月三月甲寅漳州義士陳君用襲殺反賊李
志甫授君用同知漳州路總管府事乙卯益都般陽等
處饑賑之丙辰赦漳潮二州民為李志甫劉虎仔脅從
之罪褒贈軍將死事者丁巳大鄂爾多斯風雪為災馬
多死賑鈔八萬錠癸亥四集賽役戶饑賑米千石鈔二

千錠成宗潛邸四集賽戶饑賑米二百石鈔二百錠以

知樞密院事托克托御史大夫伯勒齊爾布哈知樞密

院事雅克布哈知經筵事中書參議阿蘭法珠兼經筵

官太陰犯軒轅丁卯詔賜江南行臺御史中丞史惟良

御史中丞耿煥山東廉訪使張友諒中書參知政事許

有壬上尊東帛庚午太陰犯房宿辛未詔徙巴延於南

恩州陽春縣安置壬申太陰犯南斗丁丑以治書侍御

史達實特穆爾為奎章閣大學士翰林直學士揭傒斯

為奎章閣供奉學士戊寅太白犯月星辛巳彗星減自
二月己酉至三月庚辰凡見三十二日是月淮安路山
陽縣饑賑鈔二千五百錠糧兩月順德路邢臺縣饑賑
鈔三千錠夏四月己丑享于太廟庚寅詔大天元延壽
寺立明宗神御殿碑以同知樞密院事特穆爾達實為
中書右丞丙午詔封滿濟勒噶台為忠王及加達爾罕
之號滿濟勒噶台辭五月癸丑禁民藏軍器乙卯監察
御史博囉台言右丞相滿濟勒噶台辭達爾罕號及王

爵宜宣示以勸廉讓從之己未詔以丹巴太子擒賊阿達里特呼歿于王事追封涼王諡忠烈漳州龍巖尉黃佐才獲李志甫餘黨鄭子箕佐才因與賊戰妻子四十餘口皆遇害以佐才為龍巖縣尹丁卯太陰犯斗宿辛未降鈔萬錠給守衛宮闕內外門禁唐古左右阿蘇桂齊諤爾根欽察等衛軍丙子車駕時巡上都置月祭各影堂香於大明殿遇行禮時令省臣就殿迎香祭之以宦者拜布哈為長寧寺卿是月濟南饑賑鈔萬錠六月

丙申詔撤文宗廟主徙太皇太后布達實哩東安州安置放太子雅克特古斯於高麗其畧曰昔皇祖武宗皇帝昇遐之後祖母太皇太后惑於憊慝俾皇考明宗皇帝出封雲南英宗遇害正統寢偏我皇考以武宗之嫡逃居朔漠宗王大臣同心翊戴肇啟大事於時以地近先迎文宗暫總機務繼知天理人倫之攸當假讓位之名以寶璽來上皇考推誠不疑即授以皇太子寶文宗稔惡不悛當躬迓之際乃與其臣伊嚕布哈阿哩雅明

埒克棟阿等謀為不軌使皇考飲恨上賓歸而再御宸
極思欲自解於天下後世夫何數日之間宮車弗駕海
內聞之靡不切齒又私圖傳子乃構邪言嫁禍於班布
爾實皇后謂朕非明宗之子俾出居遐陬祖宗大業幾
於不繼內懷愧慊則殺阿哩雅以杜口上天不祐隨降
殞罰叔嬪布達實哩怙其勢燄不立明考之冢嗣而立
孺稚之弟伊埒哲伯奄復不年諸王大臣以賢以長扶
朕踐位國之大政屬不自遂者詎能枚舉每念治必本

於盡孝事莫先於正名賴天之靈權奸屏黜盡孝正名
不容復緩永惟鞠育罔極之恩忍忘不共戴天之義既
往之罪不可勝誅其命太常撤去托克托穆爾在廟之
主布達實哩本朕之嬪乃陰構奸臣弗體朕意僭太皇
太后之號迹其閨門之禍離間骨肉罪惡尤重揆之大
義削去鴻名徙東安州安置雅克特古斯年雖幼冲理
難同處朕終不陷於覆轍專務殘酷惟放諸高麗賊臣
伊嚕布哈阿哩雅已死其以明埒克棟阿等明正典刑

監察御史崔敬言雅克特古斯不宜放逐不報己亥秦
州成紀縣山崩地坼癸卯太白晝見己酉太白復晝見
辛亥太白晝見夜犯歲星是月濟南路歷城縣饑賑鈔二
千五百錠秋七月甲寅太白晝見詔封微子為仁靖公
箕子為仁獻公比干加封為仁顯忠烈公乙卯奉元路
盤屋縣河水溢漂流人民丁巳太白晝見戊午以星文
示異地道失寧蝗旱相仍頒罪己詔於天下享于太廟
己未以琳沁巴勒為御史大夫庚申太陰犯心宿壬戌

癸亥太白晝見甲子太陰犯羅堰乙丑丙寅太白復晝

見丁卯雅克特古斯薨詔以鈔一百錠備物祭之癸酉

太白晝見戊寅命翰林學士承旨達罕奎章閣學士庫

庫等刪修大元通制庚辰達勒達之地大風雪羊馬死

賑軍士鈔一百萬錠并遣使賑齊哩克十三站每站一

千錠是月禁色目人勿妻其叔母八月壬午以額森特

穆爾為御史大夫戊子祭社稷是月車駕至自上都九

月辛亥明埒克棟阿伏誅癸丑加封漢張飛武義忠顯

英烈靈惠助順王辛酉太白犯虛梁丙寅詔後有罪者
毋籍其妻女以配人丁卯太陰犯昴宿熒惑犯歲星甲
戌太陰犯軒轅冬十月甲申奉玉冊玉寶尊皇考為順
天立道睿文智武大聖孝皇帝親裸太室庚寅奉符長
清元城清平四縣饑詔遣制國用司官驗而賑之辛卯
詔各愛滿人不許與常選壬辰立曹南王阿嚙罕淮安
王巴延河南王阿珠祠丁酉太白入南斗己亥太白犯
斗宿壬寅滿濟勒噶台辭右丞相仍為太師以托克托

為中書右丞相宗正孔爾古齊特穆爾布哈為中書左
丞相是月河南府宜陽等縣大水壞民廬溺死者各給
殯葬鈔一錠仍賑義倉糧兩月十一月甲寅監察御史
實達爾言宜禁達實密回回輝和爾人等叔伯為婚姻
乙卯太陰犯虛梁以親裸大禮慶成御大明殿受羣臣
朝戊午熒惑犯氐宿甲子月食辰星犯東咸辛未以孔
克堅襲封衍聖公戊寅辰星犯天江是月處州婺州饑
以常平義倉糧賑之十二月復科舉取士制國子監積

分生員三年一次依科舉例入會試中者取一十八名
癸未太陰犯虛梁乙酉太陰犯土公丁亥熒惑犯鈞鈴
戊子罷天歷以後增設太禧宗禋等院及奎章閣乙未
熒惑犯東咸戊戌太陰犯明堂是月東平路民饑賑之
寶慶路大雪深四尺五寸

至正元年春正月己酉朔改元詔曰朕惟帝王之道德
莫大於克孝治莫大於得賢朕早歷多難入紹大統仰
思祖宗付托之重戰兢惕勵于茲八年慨念皇考久勞

于外甫即大命四海缺望夙夜追慕不忘于懷乃以至
元六年十月初四日奉玉冊玉寶追上皇考曰順天立
道睿文智武大聖孝皇帝被服袞冕裸于太室式展孝
誠十有一月六日勉徇大禮慶成之請御大明殿受羣
臣朝爰自去春疇咨于衆以知樞密院事滿濟勒噶台
為太師右丞相以正百官以親萬民尋即控辭養疾私
第再三諭旨勉令就位自春徂秋其請益固朕憫其勞
日久察其至誠俾解機務弗煩以政仍為太師而知樞

密院事托克托早歲輔朕克著忠貞乃命為中書右丞
相宗正扎爾古齊特穆爾布哈嘗歷政府嘉績著聞為
中書左丞相並錄軍國重事夫三公論道以輔予德二
相總政以弼予治其以至元七年為至正元年與天下
更始甲寅熒惑犯天江丁巳享于太廟庚申太陰犯井
宿癸亥詔天壽節禁屠宰六日辛未太陰犯心宿癸酉
太陰犯斗宿甲戌太白晝見凡四日是月命托克托領
經筵事命永明寺寫金字經一藏免天下稅糧五分湖

南諸路饑賑糶米十八萬九千七十六石二月戊寅朔
祭社稷己卯太白晝見庚辰太白復晝見辛巳立廣福
庫罷藏珍等庫乙酉濟南濱州沾化等縣饑賑鈔五萬
三千錠丙戌太白晝見癸巳太陰犯明堂乙未加封皇
姊布達實哩明惠貞懿大長公主是月大都寶坻縣饑
賑米兩月河間莫州滄州等處饑賑鈔三萬五千錠晉
州饒陽阜平安喜靈壽四縣饑賑鈔二萬錠印造至元
鈔九十九萬錠中統鈔一萬錠三月庚戌罷兩淮屯田

手號打捕軍役令屬本所領之癸丑命屯儲禦軍於河
南芍陂洪澤德安三處屯種甲寅給還特穆爾布哈宣
讓王印鎮淮西己未汴梁地震大都路涿州范陽房山
饑賑鈔四千錠丙子以行省平章政事雅克特穆爾就
佩虎符提調屯田是月般陽路長山等縣饑賑鈔萬錠
彰德路安陽等縣饑賑鈔萬五千錠夏四月丁丑道州
賊蔣丙等反破江華縣掠明遠縣戊寅彰德有赤風自
西北起晝晦如夜甲申享于太廟丁亥臨賀縣民被猺

寇鈔掠發義倉糧賑之庚寅帝幸護聖寺命中書右丞
特穆爾達實為平章政事阿魯為右丞許有壬為左丞
癸巳立富平庫隸資正院復立衛候司丁酉以兩浙水
災免歲辦餘鹽三萬引己亥立吏部司績官庚子復封
太師滿濟勒噶台為忠王罷澠州河西務彰德饑賑鈔
萬五千錠是月車駕時巡上都五月戊申以崇文監屬
翰林國史院己未罷河西務行用庫壬戌月食是月阿
勒呼木等處被災之民三千九百十三戶賑鈔二萬一

千七百五錠閏五月丁丑改封徽州土神汪華為昭忠
廣仁武烈靈顯王甲午賞賜扈從明宗諸王官屬八百
七人金銀鈔幣各有差壬寅詔刻宣文至正二寶六月
戊午禁高麗及諸處民以親子為宦者因避賦役戊辰
改舊奎章閣為宣文閣庚午太陰犯井宿是月揚州路
崇明通泰等州海潮湧溢溺死一千六百餘人賑鈔萬
一千八百二十錠秋七月己卯享于太廟乙酉太陰犯
填星庚寅太陰犯雲雨八月戊申祭社稷是月車駕至

自上都九月庚辰太陰犯建星壬午賜文臣燕於拱辰
堂己丑冀寧路嘉禾生異畝同穎壬辰太陰犯鉞星又
犯井宿壬寅許有壬進講明仁殿帝悅賜酒宣文閣中
仍賜貂裘金織文幣冬十月丁未享於太廟己酉封阿
實克布哈順寧王實保齊哈沙順國公甲寅中書省奏
海運不給宜令江浙行省於中政院財賦府撥賜諸人
寺觀田糧總運二百六十萬石從之乙卯歲星犯氐宿
丁巳太陰犯月星戊午月食既十一月丙子道州路賊

何仁甫等反戊寅彰德屬縣各添設縣尉一員庚辰分
吏部禮部兵部刑部為二庫戶部工部為二庫各設管
勾一員己亥太陰犯東井庚子太陰犯天江徭賊寇邊
詔湖廣行省平章政事袞布巴勒總兵討平之定賞有
差十二月乙卯詔民年八十以上蒙古人賜繒帛二表
裏餘州縣旌以高年耆德之名免其家雜役丁巳太白
犯壘壁陣己未立四川安岳縣增設嘉興等處鹽倉壬
戌雲南車里寒賽刀等反詔雲南行省平章政事托克

托穆爾討平之癸亥以前至元中統鈔二百八十二萬
二千四百八十八錠可支二年住造明年鈔本詔革王
巴延徹爾等所獻檀景等處產金地土山東燕南強盜
縱橫至三百餘處選官捕之復立拱儀局己巳以翰林
學士承旨張起巖知經筵事是月復立司裡監加封真
定路滹沱河神為昭佑靈源侯

二年春正月丁丑享于太廟丙戌開京師金口河深五
十尺廣一百五十尺役夫一十萬戊子太陰犯明堂癸

已遣翰林學士三保等代祀五嶽四瀆甲午禁惑犯月
星是月大同饑人相食運京師糧賑之順寧保安饑賑
鈔一萬錠廣平磁威州饑賑鈔五萬錠降咸平府為縣
升懿州為路以大寧路所轄興中義州屬懿州二月壬
寅頒農桑輯要戊申祭社稷乙卯李實迪偽造御寶聖
旨稱樞密院都事伏誅己巳織造明宗御容是月彰德
路安陽臨漳等縣饑賑鈔二萬錠大同路渾源州饑以
鈔六萬二千錠糧二萬石兼賑之大名路饑以鈔萬二

千錠賑之河間路饑以鈔五萬錠賑之三月戊寅親試
進士七十八人賜拜珠陳祖仁及第其餘出身有差辛
巳冀寧路饑賑糶米三萬石戊子太陰犯房宿是月順
德路平鄉縣饑賑鈔萬五千錠衛輝路饑賑鈔萬五千
錠杭州路火災給鈔萬錠賑之夏四月辛丑冀寧路平
晉縣地震聲鳴如雷裂地尺餘民居皆傾乙巳享于太
廟己酉罷雲南蒙慶宣慰司庚申太陰犯羅堰是月車
駕時巡上都五月甲申太白經天丁亥以浙江行省平

章政事珠爾噶岱為河南行省平章政事東平雨雹如
馬首六月戊申命江浙撥賜僧道田還官徵糧以備軍
儲壬子濟南山崩水湧乙丑罷邦牙宣慰司是月汾水
大溢秋七月庚午惠州路羅浮山崩辛未享于太廟乙
未太陰掩太白丁酉太白晝見己亥慶遠路莫八聚眾
反攻陷南丹左右江等處命托克托濟延討平之立司
獄司於上都比大都兵馬司是月佛郎國貢異馬長一
丈一尺三寸高六尺四寸身純黑後二蹄皆白八月庚

子朔日有食之癸卯罷上都事產提舉司丙午太白晝
見戊申祭社稷是月冀寧路饑賑糶米萬五千石九月
己巳詔湖廣行省平章政事袁布巴勒領河南江浙湖
廣諸軍討道州賊平之復平嶧峒堡寨二百餘處辛未
車駕至自上都丁丑太陰犯羅堰京城強賊四起戊子
太陰犯井宿是月歸德府睢陽縣因黃河為患民饑賑
糶米萬三千五百石冬十月己亥朔日有食之癸卯太
陰犯建星陝西行省平章政事托多辭職侍親不允丁

未享于太廟甲寅太陰犯天闕壬戌詔遣官致祭孔子
于曲阜罷織染提舉司甲子杭州嘉興紹興温州台州
等路各立檢校批驗鹽引所權免兩浙額鹽十萬引福
建餘鹽三萬引十一月甲申詔免雲南明年差稅辛卯
歲星熒惑太白聚於尾宿十二月壬寅申服色之禁丙
午命中書右丞太平樞密副使姚庸御史中丞張起巖
知經筵事己酉京師地震辛亥封鴻和特穆爾之子徹
爾特穆爾為撫寧王丙辰賜雲南行省參知政事布拉

三珠虎符以兵討死可伐癸亥阿魯圖們等以謀害宰
臣圖為叛逆伏誅

元史卷四十

元史卷四十考證

至元五年八月丁亥朔十二月癸卯 按五月己未朔

合大小盡計之丁亥應是八月朔今增癸卯訛癸酉
據天文志改又六年十一月戊寅辰星犯天江江訛
置據五行志改

六年春正月立司裡監 按百官志復立司裡監在至
元元年十二月

追封庫爾濟蘇 下文晉寧王之上復追封字今刪又

滿濟勒噶台辭右丞相職右訛左按滿濟勒噶台為
右丞相事見上文據改

二月己酉彗星見三月辛巳彗星滅 按彗星見於己
酉至辛巳滅原文上脫見字下訛滅為見今改正

輝和爾 原文作主吾考元時諸色目人無此名今仍
照畏吾畫一譯改

十二月罷天厯以後增設太禧宗裡等院及奎章閣

按續通鑑載文宗設太禧宗裡等院及奎章閣藝文

監至是悉議罷用庫庫言乃改奎章閣為宣文閣藝
文監為崇文監又按百官志藝文監之改即在是年
十二月奎章閣之改則在至正元年九月紀於藝文
監之改罷未及而改奎章閣又書於明年六月亦與
志繫月不符

至正元年二月戊寅朔祭社稷 按祭祀志云太社太
稷祭以春秋二仲月上戊延祐六年改用中戊仁宗
本紀並同第考延祐七年八月丁未朔戊申祭社稷

金
五
口
人
ノ
二
一
即復用上戊矣故順帝是年春祭亦用上戊雖禮官
有定議而上戊中戊仍參用也





總校官編修臣吳紹濬

欽定四庫全書薈要

史部
元史卷四十三

詳校官主事銜臣徐以坤



欽定四庫全書薈要卷六千四百二十 史部

元史卷四十一

明翰林學士亞中大夫知制誥兼修國史宋濂等修

紀第四十一

順帝四

三年春正月丙子中書左丞許有壬辭職丁丑享于太廟乙酉中書平章政事納琳辭職庚寅沙汰集賽台名數二月戊戌祭社稷甲辰太陰犯井宿填星犯牛宿熒

惑犯羅堰丁未立四川省檢校官遼陽沃濟野人叛乙卯太陰犯氐宿是月汴梁路新鄭密二縣地震寶慶路饑判官文殊勞以所受勅牒貸官糧萬石賑之秦州成紀縣鞏昌府寧遠伏羌縣山崩水涌溺死人無算三月壬申造盞頂殿監察御史成遵等言可用終場下第舉人充學正山長國學生會試不中者與終場舉人同戊寅詔作新風憲在內之官有不法者監察御史劾之在外之官有不法者行臺監察御史劾之歲以八月終出

巡次年四月中還司壬午太陰犯氐宿是月詔修宋遼
金史以中書右丞相托克托為都總裁官中書平章政
事特穆爾達實中書右丞太平御史中丞張起巖翰林
學士歐陽玄侍御史呂思誠翰林侍講學士揭傒斯為
總裁官夏四月丙申朔日有食之乙巳享于太廟是月
兩都桑果葉皆生黃色龍文車駕時巡上都五月河決
白茅口六月壬子命經筵官月進講者三是月回回拉
里五百餘人渡河寇掠解吉濕等州中書戶部以國用

不足請搏節浮費秋七月丁卯享于太廟戊辰修大都城戊寅立永昌等處宣慰司庚辰太白犯右執法是月興國路大旱河南自四月至是月霖雨不止戶部復言搏節錢糧八月甲午朔晉寧路臨汾縣獻嘉禾一莖有八穗者命圖沙瑪同知宣慰司事縑勒噶等討四川上蓬瑣吃賊戊戌祭社稷山東賊焚掠兗州是月車駕還自上都九月甲子湖廣行省平章政事衮布巴勒擒道州賀州徭賊首唐大二蔣仁五至京誅之其黨蔣丙自

號順天王攻破連桂二州甲申修理太廟遣官告祭奉
遷神主於後殿冬十月乙未增立巡防捕盜所於永昌
丁酉告祭太廟奉安神主戊戌帝將祀南郊告祭太廟
至寧宗室問曰朕寧宗兄也當拜否太常博士劉聞對
曰寧宗雖弟其為帝時陛下為之臣春秋時魯閔公弟
也僖公兄也閔公先為君宗廟之祭未聞僖公不拜陛
下當拜帝乃拜丁未月食巳酉帝親祀上帝于南郊以
太祖配癸丑命僉樞密院事韓元善為中書參知政事

中書參議敏珠爾丹同知宣徽院事己未以郊禮成詔
大赦天下文官普減一資武官陞散官一等蠲民田租
五分賜高年帛以湖廣行省平章政事袞布巴勒為宣
徽院使行樞密院知院拉拉為翰林學士承旨十一月
辛未享于太廟十二月丙申詔寫金字藏經丁未以伯
勒齊爾布哈為中書左丞相是月膠州及高密縣地震
河南等處民饑賑糴麥十萬石是歲詔立常平倉罷民
間食鹽徵遺逸托音巴延張瑾杜本本辭不至

四年春正月辛未享于太廟辛巳詔定守令黜陟之法
六事備者陞一等四事備者減一資三事備者平遷六
事俱不備者降一等庚寅河決曹州雇夫萬五千八百
修築之是月河又決汴梁二月戊戌祭社稷辛丑四川
行省立惠民藥局是月以中書右丞太平為平章政事
閏月辛酉朔永平澧州等路饑賑之乙亥月食三月丁
酉復立武功縣壬寅授巴特瑪多爾濟征東行省左丞
相嗣高麗國王癸丑以河南行省平章政事納琳為中

書平章政事集賢大學士姚庸為中書左丞夏四月丁亥復立廣樣局是月車駕時巡上都五月乙未右丞相托克托辭職不許甲辰許之以阿魯圖為中書右丞相乙巳封托克托為鄭王食邑安豐賜金印海青文豹等物辭不受是月大霖雨黃河溢平地水二丈決白茅堤金堤曹濮濟兗皆被灾六月戊辰鞏昌隴西縣饑戶貸常平倉粟三斗俟年豐還官己巳賜托克托松江田為立松江等處稻田提領所秋七月戊子朔温州颶風作

海水溢地震益都瀕海鹽徒郭和尼齊作亂己丑享于
太廟是月濼河水溢八月戊午祭社稷丁卯山東霖雨
民饑相食賑之丙戌賜托克托金十錠銀五十錠鈔萬
錠幣帛二百疋辭不受是月陝西行省立惠民藥局莒
州蒙陰縣地震郭和尼齊上太行由陵川入壺關至廣
平殺兵馬指揮復還益都車駕還自上都九月丁亥朔
日有食之丙午命太平提調都水監辛亥以南臺治書
待御史秦從德為浙江行省參知政事提調海運癸丑

命御史大夫額森特穆爾平章政事特穆爾達實知經筵事右丞達實特穆爾提調宣文閣知經筵事冬十月乙酉議修黃河淮河堤堰十一月丁亥朔以各郡縣民饑不許抑配食鹽復令民入粟補官以備賑濟戊子禁內外官民宴會不得用珠花己亥保定路饑以鈔八萬錠糧萬石賑之戊申河南民饑禁酒十二月己未四川廉訪司建言廣元等五路廣安等三府永寧等兩宣撫司請依內郡設置推官一員從之壬戌太陰犯外屏癸

亥漢陽地震戊寅徭賊寇靖州是月東平地震禁淫祠
賑東昌濟南般陽慶元撫州饑民是歲徭賊寇潯州同
知府事實通率民兵擊走之

五年春正月辛卯享于太廟是月薊州地震二月戊午
祭社稷三月辛卯帝親試進士七十有八人賜布延布
哈張士堅進士及第其餘賜出身有差是月以陳思謙
參議中書省事先是思謙建言所在盜起蓋由歲饑民
貧宜大發倉廩賑之以收人心仍分布重兵鎮撫中夏

不聽大都永平鞏昌興國安陸等處并桃溫萬戶府各
翼民饑賑之夏四月丁卯詔大都流民官給路糧遣其
還鄉是月汴梁濟南邠州瑞州等處民饑賑之募富戶
出米五十石以上者旌以義士之號車駕時巡上都五
月己丑詔以軍士所掠雲南子女一千一百人放還鄉
里仍給其行糧不願歸者聽丁未河間轉運司竈戶被
水災詔權免餘鹽二萬引候年豐補還官六月廬州張
順興出米五百餘石賑饑旌其門秋七月丁亥河決濟

陰巳丑享于太廟丙午命額森特穆爾特穆爾達實並
為御史大夫詔作新風紀八月戊午祭社稷是月車駕
還自上都九月壬午日有食之戊戌開酒禁辛丑以中
書右丞達實特穆爾為翰林學士丞旨中書參知政事
吹斯戩為右丞資政院使多爾濟巴勒為中書參知政
事是月罷鄂囉冬十月壬子以中書平章政事太平為
御史大夫乙卯享于太廟辛酉命奉使宣撫巡行天下
詔曰朕自踐阼以來至今十有餘年託身億兆之上端

居九重之中耳目所及豈能周知故雖夙夜憂勤覲安
黎庶而和氣未臻災眚時作聲教未洽風俗未淳吏弊
未祛民瘼滋甚豈承宣之寄糾劾之司奉行有所未至
歟若稽先朝成憲遣官分道奉使宣撫布朕德意詢民
疾苦疏滌冤滯蠲除煩苛察官吏賢否明加黜陟有罪
者四品以上停職申請五品以下就便處決一切興利
除害之事悉聽舉行命江西行省左承和爾多卜丹吏
部尚書和執禮巡兩浙江東道前雲南行省右丞薩克

織將作院使王士宏巡江西福建道大都路達嚕噶齊
巴克實江浙行省參知政事秦從德巡江南湖廣道吏
部尚書達繳宣政院魏景道巡河南江北道資政院
使曼濟兵部尚書李獻巡燕南山東道兵部尚書布哈
樞密院判官靳義巡河東陝西道宣政院同知伯嘉努
宣徽僉院王伊蘇袋爾巡山北遼東道荆湖北道宣慰
使阿齊拉兩淮運使杜德遠巡雲南省上都留守阿雅
噶齊陝西行省左丞王紳巡甘肅永昌道大都留守達

爾瑪實哩河南行省參知政事王守誠巡四川省前西
臺中丞鼎鼎集賢侍講學士蘇天爵巡京畿道平江路
達嚕噶齊尊達實哩都水監賈惟貞巡海北海南廣東
道黃河泛溢辛未遼金宋三史成右丞相阿嚕圖進之
帝曰史既成書前人善者朕當取以為法惡者取以為
戒然豈止激勸為君者為臣者亦當知之卿等其體朕
心以前代善惡為勉已卯監察御史布達實哩請罷造
作不急之務是月以呂思誠為中書參知政事十一月

甲午至正條格成奉元路陳望叔偽稱雅克特古斯大
子伏誅十二月丁巳詔定薦舉守令法是歲宣徽院伸
都稜特穆爾知樞密院事馮思溫為御史中丞

六年春二月庚戌朔日有食之辛未興國雨雹大者如
馬首是月山東地震七日乃止三月辛未盜扼李開孫
之閘河劫商旅船兩淮運使宋文瓚言世祖開會通河
千有餘里歲運米至京者五百萬石今騎賊不過四十
人劫船三百艘而莫能捕恐運道阻塞乞選能臣率壯

勇千騎捕之不聽戊申京畿盜起范陽縣請增縣尉召
巡兵從之山東盜起詔中書參知政事索諾木巴勒至
東平鎮過八番龍宜來進馬夏四月壬子遼陽為捕治
東青煩擾沃濟野人及碩達勒達叛癸丑以長吉為白
太子宮傅官頒至正條格於天下甲寅以中書參知政
事呂思誠為左丞乙卯享于太廟丁卯車駕時巡上知
發米二十萬石賑糶貧民萬戶邁珠等討沃濟野人遇
害詔恤其家以中書左丞呂思誠知經筵事命左右二

司六部吏屬於午後講習經史五月壬午陝西饑禁酒
象州盜起江西田賦提舉司擾民罷之丁亥盜竊太廟
神主遣哈喇哈達討沃濟野人丁酉以黃河決立河南
山東都水監六月己酉汀州連城縣民羅天麟陳積萬
叛陷長汀縣福建元帥府經歷哲伯萬戶廉和尚等討
之丁巳詔以雲南賊死可伐盜據一方侵奪路甸命額
圖琿為雲南行省平章政事討之秋七月己卯享于太
廟丙戌以遼陽沃濟野人等未靖命太保巴咱爾為遼

陽行省左丞相鎮之丁亥降詔招諭死可伐散毛洞蠻
覃全在叛招降之以為散毛誓厓等處軍民宣撫使置
官屬給宣勅虎符設立驛舖癸巳詔選集賽官為路府
縣達嚕噶齊丙申以多爾濟巴勒為中書右丞達爾瑪
為參知政事壬寅以御史大夫琳沁巴勒等知經筵事
甲辰京畿奉使宣撫鼎鼎奏言御史實巴勒等罪杖黜
之時諸道奉使與臺憲互相掩蔽惟鼎鼎與湖廣道巴
克實糾舉無避八月丙午命江浙行省右丞呼圖克布

哈江西行省右丞圖嚕合討羅天麟戊申祭社稷是月
車駕還自上都九月乙酉克復長汀戊子邵武地震有
聲如鼓至夜復鳴冬十月思靖搖寇犯武岡詔湖廣省
臣及湖南宣慰元帥諤勒哲特穆爾討之俘斬數百級
賊敗走閏月乙亥詔赦天下免差稅三分水旱之地全
免靖州搖賊吳天保陷黔陽癸未汀州賊徒羅德用殺
首賊羅天麟陳積萬以首級送官餘黨悉平十二月丁
丑省臣改擬明宗母壽章皇后徽號曰莊獻嗣聖皇后

已卯改立山東東西道宣慰使司都元帥府開設屯田
駐軍馬甲申詔復立大護國仁王寺昭應宮財用規運
總管府凡貸民間錢二十六萬餘錠辛卯有司以賞賚
汎濫奏請恩賜必先經省臺院定擬甲午設立哈哈拉
塔屯田二處詔犯贓罪之人常選不用復立八百宣慰
司以土官韓部襲父爵辛丑以濟蘭巴爾為太尉開府
置僚屬壬寅山東河南盜起遣左右阿蘇衛指揮布爾
噶等討之是歲黃河決尚書李綱請躬祀郊廟近正人

遠邪佞以崇陽抑陰不聽

七年春正月甲辰朔日有食之大寒而風朝官仆者數
人已百享于太廟壬子命中書左丞相伯勒齊爾布哈
為右丞相尋辭職丁巳復立東路蒙古軍都元帥府庚
申雲南老了等蠻來降立老了耿凍路軍民總管府丙
寅以廣西宣慰使章巴延討徭獠有功陞湖廣行省左
丞詔以集賽台支給浩繁除累朝定額外悉罷之二月
甲戌朔興聖宮作佛事賜鈔二十錠己卯山東地震壞

城郭棣州有聲如雷河南山東盜蔓延濟寧滕邳徐州
 等處庚辰以中書參知政事索諾木巴勒為中書右丞
 道通為中書參知政事丙戌以宦者拜特穆爾為司徒
 是月徭賊吳天保寇沅州以昂吉爾知樞密院事治軍
 務三月甲辰中書省臣言世祖之朝省臺院奏事給事
 中專掌之以授國史纂修近年廢弛恐萬世之後一代
 成憲無從稽考乞復舊制從之乙巳遣使銓選雲南官
 員修光天殿庚戌試國子監會食弟子員選補路府及

各衛學正戊午詔編六條政類庚申監察御史王士點
劾集賢大學士吳直方躡進官階奪其宣命乙丑雲南
王博囉來獻死可伐之捷壬申遣使修上都大乾元寺
命有司定弔賻諸王公主駙馬禮儀之數夏四月乙亥
命江浙省臣講究役法己卯享于太廟辛己遣達本賀
方使于占城以通政院使都蘭格爾為遼陽行省參知
政事討沃濟野人己丑糴米二十萬石賑貧民以翰林
學士承旨鼎珠為中書右丞庚寅復命伯勒齊爾布哈

為中書右丞相以中書平章政事特穆爾達實為左丞
相臨清廣平灤河等處盜起遣兵捕之通州盜起監察
御史言通州密邇京城而盜賊蜂起宜增兵討之以杜
其源不聽是月河東大旱民多饑死遣使賑之車駕時
巡上都五月庚戌徭賊吳天保陷武岡路詔遣湖廣行
省右丞實保統軍討之乙丑右丞相伯勒齊爾布哈以調
變失宜災異迭見罷詔以太保就第是月臨淄地震七
日乃止六月詔免太師滿濟勒噶台官安置西寧州其

子托克托請隨父行以御史大夫太平為中書平章政事彰德路大饑民相食秋七月甲寅召隱士諤勒哲圖濟爾噶朗為翰林待制張樞董立為修撰李孝先為著作郎張樞不至丙辰太陰犯壘壁陣丁巳以江南行臺大夫納琳為御史大夫是月徭賊吳天保復寇沅州陷澉浦辰溪縣焚掠無遺徙滿濟勒噶台於甘肅以伯勒齊爾布哈之譖也九月癸卯巴哩納哈刺諾海塔爾哈巴賊起斷嶺北驛道甲辰遼陽霜早傷禾賑濟驛戶戊

申車駕還自上都癸丑上都鄂爾多成用鈔九千餘錠
甲寅詔舉才能學業之人以備侍衛丁巳中書左丞相
特穆爾達實薨辛酉以御史大夫多爾濟為中書左丞
相甲子集慶路盜起鎮南王博囉布哈討平之丁卯孫
寇吳天保復陷武岡延及寶慶殺湖廣行省右丞實保
于軍中冬十月辛未享于太廟丁丑詔左右丞相平章
樞密知院御史大夫得賜玉押字印餘官不與庚辰詔
建穆呼哩巴延祠堂於東平丙戌琳沁達剌反詔遣兵

討之辛卯開東華射圃戊戌西番盜起凡二百餘所陷
哈喇和卓劫供御蒲萄酒殺使臣是月搖賊吳天保復
寇沅州州兵擊走之十一月辛丑監察御史齊竒以宦
者隆普憑藉寵幸驟陞榮祿大夫追封三代田宅踰制
上疏劾之甲辰沿江盜起剽掠無忌有司莫能禁兩淮
運使宋文瓚上言江陰通泰江海之門戶而鎮江真州
次之國初設萬戶府以鎮其地今戍將非人致使賊艦
往來無常集慶花山劫賊才三十六人官軍萬數不能

進討反為所敗後竟假手鹽徒雖能成功豈不貽笑宜
亟選智勇以任兵柄以圖後功不然東南五省租稅之
地恐非國家之有不聽撥山東地土十六萬二千餘頃
屬大承天護聖寺乙巳中書戶部言各處水旱田禾不
收湖廣雲南盜賊蜂起兵費不給而各位集賽冗食甚
多乞賜分減帝牽於衆請令三年後減之庚戌太陰犯
天廩懷慶路饑搖賊吳天保復陷武岡命湖廣行省平
章政事果勒領兵討之以河決命工部尚書穆爾瑪哈

穆特行視金堤甲寅徭賊吳天保陷靖州命威順王庫
春布哈鎮南王博羅布哈及湖廣江西省以兵討之丁
巳命中書平章政事太平為左丞相辭不允戊午命河
南山東都府發兵討湖廣洞蠻己未以中書省平章政
事韓竒納為陝西行臺御史大夫迤北荒旱缺食遣使
賑驛戶丁卯海北湖南徭賊竊發兩月餘有司不以聞
詔罪之并降散官一等是月滿濟勒噶台薨召托克托
還京十二月庚午以中書左丞相多爾濟為右丞相平

章政事太平為左丞相詔天下丙子以連年水旱民多
失業選臺閣名臣二十六人出為郡守縣令仍許民間
利害實封呈省壬午晉寧東昌東平恩州高唐等處民
饑賑鈔四十萬錠米六萬石丙戌中書省臣建議以河
南盜賊出入無常宜撥達勒達軍與揚州舊軍於河南
水陸關隘戍守東至徐邳北至夾馬營遇賊掩捕從之
是月陝西行御史臺臣劾伯勒齊爾布哈乃逆臣之親
子不可居太保之職不從是歲置中書議事平章四人

隆福宮三皇后鴻吉哩氏年尼實哩薨

八年春正月戊戌朔命額森特穆爾知樞密院事丁未
享于太廟辛亥黃河決遷濟寧路於濟州詔各官府諸
練事務之人毋得遷調召翰林國史院纂修后妃功臣
列傳學士承旨張起巖學士楊宗瑞侍講學士黃潛為
總裁官左丞相太平左丞呂思誠領其事甲子摩琳等
處大雪羊馬凍死賑之是月詔給銅虎符以宮尉諤勒
哲布哈桂齊衛副指揮使壽山監湖廣軍命湖廣行省

右丞圖沁湖南宣慰都元帥諤勒哲特穆爾討莫磐洞
諸蠻斬首數百級其餘二十餘洞擒洞首楊鹿五赴京
師二月癸酉御史大夫納琳加太尉致仕乙亥以北邊
地寒罷哈哈拉塔屯田丙子命太子阿裕爾實哩達喇習
讀輝和爾文字庚辰太陰犯軒轅癸未太陰犯平道甲
申命彙節為江南行臺御史大夫壬辰太平言布達爾
爾圖莽果三處屯田世祖朝以行營舊站撥屬虎賁司
後為豪右有力者所奪遂失其利今宜仍撥還從之是月

以前奉使宣撫賈惟貞稱職特授永平路總管會歲饑
惟貞請鈔四萬餘錠賑之詔濟寧鄆城立行都水監以
賈魯為都水監三月丁酉詔以東帛旌郡縣守令之廉
勤者遼東薩古納反詐稱大金子孫碩達勒達路托克
托和斯唐古和爾果斯討擒之壬寅土番盜起有司請
不拘資級委官討之福建盜起遠難討捕詔汀漳二州
立分元帥府轄之癸丑帝親試進士七十八人賜阿勒
呼木特穆爾王宗哲進士及第餘出身有差己酉湖廣

行省遣使獻石壁洞蠻捷丙辰太陰犯建星己未遣使
詣江浙江西湖廣四川雲南銓福建番廣蠻夷等處官
員選辛酉遼陽烏雅博囉罕妾稱大金子孫受玉帝符
文作亂官軍討斬之壬戌六條政類書成京畿民饑徽
州路達嚕噶齊哈喇布哈以政績聞詔賜金帛旌之是
月搖賊吳天保復寇沅州夏四月辛未河間等路以連
年河決水旱相仍戶口消耗乞減鹽額詔從之乙亥帝
幸國子學賜衍聖公銀印升秩從二品定弟子員出身

及奔喪省親等法詔守令選立社長專一勸課農桑詔
京官三品以上歲舉守令一人守令到任三月亦舉一
人自代其諤德齊拱衛百戶不得授縣達魯噶齊止授
佐貳久著廉能則用之平江松江水災賑給海運糧十
萬石丁丑遼陽董哈喇作亂鎮撫奇徹討擒之己卯海
寧州沐陽縣等處盜起遣翰林學士圖沁布哈討之是
月享于太廟車駕時巡上都命托克托為太傅湖廣章
巴延引兵捕土寇莫萬五蠻雷等已而廣西峒賊乘隙

入寇已延退走五月丁酉朔大霖雨京城崩庚子廣西

山崩水湧灘江溢平地水深二丈餘屋宇人畜漂沒壬

子寶慶大水丁巳四川旱饑禁酒六月丙寅朔陞徐州

為總管府以邳宿滕嶧四州隸之丙戌立司天臺于上

都是月山東大水民饑賑之秋七月丙申朔日有食之

辛丑復立五道河屯田乙巳享于太廟旌表大都節婦

鞏氏門戍申西北邊軍民饑遣使賑之壬子量移竄徙

官于近地安置死者聽歸葬乙卯遣使祭曲阜孔子廟

江州路總管劉恒有政績授山東宣慰使丙申以阿拉克布哈為大司徒八月丙子太陰犯壘壁陣己卯山東雨電是月車駕還自上都九月己未大陰犯靈臺冬十月丁亥廣西蠻掠道州十一月辛亥猺賊吳天保率眾六萬掠全州是歲詔賜高年帛設分元帥府于沂州以馬勒岱為元帥備山東寇台州方國珍為亂劫漕運命江浙行省參知政事多爾濟巴勒討之監察御史張楨劾太尉阿齊拉欺罔之罪又言明埒克棟阿阿哩雅伊

魯布哈皆陛下不共戴天之讐已延賊殺宗室嘉王郊
王十二口稽之古法當伏門誅而其子兄弟尚仕朝宜
急誅竄伯勒齊爾布哈阿附權奸亦宜遠貶今災異迭
見盜賊蜂起海寇敢于要君閫帥敢于玩寇若不振舉
恐有唐末藩鎮噬臍之禍不聽監察御史李泌言世祖
誓不與高麗共事陛下踐世祖之位何忍忘世祖之言
乃以高麗竒氏亦位皇后今災異屢起河決地震盜賊
滋蔓皆陰盛陽微之象乞仍降為妃庶幾三辰奠位災異

可息不聽



元史卷四十一

元史卷四十一考證

至正三年三月造蓋頂殿 蓋訛鹿據輟耕錄改卷內
立惠民藥局立訛定據永樂大典改又敘浦辰溪據
地理志改

七年春正月庚申雲南老了等蠻來降 老了寰宇記
作老撾

二月道通為中書參知政事 按宰相表道通為參政
在是年三月

八年夏四月湖廣章巴延引兵捕土寇莫萬五蠻雷等
按至正七年章巴延以討搖獠有功授湖廣行省
左丞此處章巴延當即是不書官職疑係脫誤